


# *KUUTWA, KULEMUHA NI KUEZA SESIÑWI FA LINZWI LA MULIMU*

 Cwale, matepu aa, a mwa mukopano kakusasana cwana, ha si ka lekiwa, ki a Keleke feela kamba mutu yomuñwi, kakuli a talimana fela fa Tuto. Mi mwa mukopano ya kwande kwani, li tisanga lyanganisi, kakuli ha ku konahali kuli bubeli bwa luna lubone hande liito ka liito, kono lu lukela kuba pilu ni pilu, nihakuli cwalo. Kono taba ki ye, luna ba mwa tabernakele mo, matepu aa, mwa lemuhanga fa...Ki a balikani fela, ni babañwi cwalo.

<sup>2</sup> Cwale ha lu inamiseni litho za luna fa nako nyana kwa tapelo. Ki ba bakai baba tabela ku hupulwa hamunze muinamisize your litho za mina cwalo? Ka kunanula fela lizoho, muli, “Mulena, Ni—Ni tokwile kacenu, mi Ni tokwa muhau wa Hao,” kaufela sesilli sona.

<sup>3</sup> Ndata luna yakwa Lihalimu, lu atumela Lubona lwa Hao lwa sishemo, kakuli lu kupilwe kueza cwalo. Mi ne lu bulelezwi ki Mwana Hao, ni Mupulusi wa luna, kuli haiba lu kupa ku Wena sika kaufela ka Libizo la Hae, si ka fiwa. Kabakaleo, Mulena, ka kuziba kuli lupila mwa miluti ya Kutaha kwa Hae, mi cwale lu yemi mwa miluti ya sishemo sa Hae, kona kuli luka kupa, Mulena, kuli U lu ketele, ka Moya o Kenile, lika ze lu lukela kukupa. Mi luikutwa kuli kakusasana woo, kuli lisike za shutana kwa Linzwi la Hao kamba kwa kuluka kwa Hao ko kutuna, ni sishemo sa Hao ni muhau, kuli haiba lu kupa cwalo kacenu luka ba ni poto yeipitezi yezwa kwa Moya o Kenile. Kuli Akone kutaha mwahala luna mi a lemuhe milelo ya lipilu za luna, a patulule ku luna libaka ze fokola, mi ufolise matuku a luna, mi utame lipilu ze lobehile, ni kupilisa baba latehile, mi u lukiseze sicaba kwa Kutaha kwa Hao. Mulena, utwa tapelo yee.

<sup>4</sup> Cwale lu ka bala Linzwi la Hao. Mi—mi lwa lapela, Mulena, kuli tuto ya sikolo sa luna sa la Sunda kakusasana cwana, kuli U lu tiseze buino sakata bwa palo mi u Li patululele kwa lipilu za luna. Kakuli, lu tahanga kwanu ka mulelo ulimumu. Mulelo wo, unosi, ki ku Ku ziba hande. Luna babali Bakreste, ka Tumelo, lu bata ku Ku ziba hande. Bani baba si ka ba kale Bakreste, ba bata ku Ku ziba kuba Mupulusi wa bona. Haili ba ba kula, baba bata ku Ku ziba kuba Mufolisi wa bona. Mi lu lapela kuli kusike kwa ba ni alimuñwi ya ka sialela mwa muyaho moo, mukungulu, kono ibe kuli kupo kaufela italelezwe kuya ka litaku za yona, mi takazo kaufela ikatanyezwe, mi kaufela—kaufela mutu atabele, mi a zwe mwa muyaho mo, abulele kuli, inge bani bene ba zwa

kwa Emmausi, “Hanili lipilu za luna ne li tuka mwahala luna, ha Na sweli ku ambola ku luna mwahala musipili?” Kakuli lu kupa ka Libizo la Jesu. Amen.

<sup>5</sup> Cwale ku mina baba bata kuapula mwa Buka ya mina. Hañata, Ni fumani cwana, kuli mwa lisebelezo za bulumiwa, kuli mwahala mizuzu ye mashumi amabeli kamba mashumi amalalu kubanga ni mata amatuna hahulu mwa kutazo yetezi moya, mi kuzwa foo ni kubizeza sicaba kwapili. Kono ye haili sikolo sa la Sunda, Ha ni lati kueza cwalo kakusasana cwana. Ni ikutwa kuetelelwa hahulu kuli ni bulele fa Linzwi.

<sup>6</sup> Cwale, haiba kuna ni ya si ka lukuluha, mwendi kubatile hahulu, kona kuli se mu lukela fela kueza ki. . . Muzwale waka, yena mubabaleli, u inezi kwa mulaho wa keleke kwani, mu nanulele fela lizoho la mina sina *cwana* kwa mulaho kwani, ku yena, mi uka mi futumaleza moya. Mi lubata kuli muikutwe ku lukuluha ni kuba fela hande luli. Mi mu teezele kwa Linzwi, kakuli lu sepile Moya o Kenile kuli u lu lute Linzwi la Mulimu. Mi kana mwa utwa hande kaufela mina, kwa mulaho kafoo? Haiba mwa utwa, mu nanule mazoho a mina, haiba mwa—haiba mwa kona kuutwa hande. Zeo ki zende.

<sup>7</sup> Ni bata kuli muapule ni na, Nina ni litaba ze ñozwi kulo fa, ni Mañolo. Kacwalo Ni bata kuli mu apule hamoho ni na, pili, mwa Buka ya Maroma, Maroma, kauhanyo ya 9. Mi lu bata kubala ka tuto ya Mañolo, pili, mwa Maroma 9:11.

*(Kakuli bana ba si ka pepwa, mi ba si ka eza bunde kamba bumaswe, kuli kutiye mulelo wa Mulimu wa buiketelo bwa hae, isi ka misebezi, kono ka buiketelo bwa hae yena ya biza;)*

*Ne ikuizwe ku yena, Yomuhulu uka sebeleza yomunyinyani.*

*Sina ha ku ñozwi kuli, Ni latile Jakobo, mi Ni toile Esau.*

<sup>8</sup> Mi Mulimu akeze limbuyoti za Hae kwa palo ya Liñolo le. Mi cwale kwa taba, ye ka zamaelela ni tuto yaka, Ni bata kunga ye kuba toho ya taba: *Kuutwa, Kulemuha, Kueza Sesiñwi Fa Linzwi La Mulimu*. Mwendi ni kutele fateni hape. “Kuutwa, ni kulemuha, ni kueza sesiñwi fa Linzwi la Mulimu.”

<sup>9</sup> Cwale, lwa ziba handendende, luna sicaba baba Balanga Mañolo musihali ni busihu, ni kubala makande a luna ni kuutwa baba komenta ba makande, kuli lifasi le se li yemi mwa kuñomelwa kwa mata amabeli amatuna a moya. Mi bubeli bwa ona ki mata a bulapeli. Mi Ni lumela kuli ona mata amatuna ao cwanoñu ataha kwa kuba toho. Mi ona mata amabeli ao yemelwa ki bana bababeli ba Isaka. Kuli mane Mulimu, mwa zibo ya Hae ye ipitezi, u lu bonisize kale lika; kuli lukone kuziba ka zona lika zee, ka niti, ze li fapila luna. U li beile fa ngandaleza, kuli Mulimu ni Linzwi la Hae, ni sibupeho ni lihalimu la Hae, li

beilwe hande hamoho, kuli mane nihaiba—nihaiba muezalibi wa kona kubona sika se si libelela kunga sibaka. Mulimu u li tomile hande luli. Hakuna yana ni buinyazo.

<sup>10</sup> Cwale, lu bona mwa bana bababeli ba ha ne basali, mane ba si ka pepwa kale, ne ba hohana mwahala bona. Nihaike nge kuli maa bona wa mwalyanjo. . . Kakuli, na li mwalyanjo, Rebekah yomunde yana nyezi peu ye lukile ya sepiso ya Mulimu, Isaka; kuli nebali balumeli bababeli baba tozizwe, balumeli babatezi Moya wa Mulimu, be ne ba lukiselizwe kale kwa linyalo lene li ba kopanyize. Mulimu na li zibile kale. Mi cwale nto ye cwalo neika taha cwani ka me alimumu yani, ka ndate alimumu? Yomuñwi, ali mutu ya maswe maswe; mi yomuñwi, ali mutu yomunde hahulu; mane kuli mutu yomunde na bonahala kuba ya maswe, mi ya maswe ki yena yana bonahala kuba yomunde.

<sup>11</sup> Cwale seo ki kuli, kubile cwalo kamita, ka nako kaufela ikabanga tukiso ya Mulimu. Mulimu ha koni kucinca tukiso ya Hae. Kakuli, U ezanga tukiso ya Hae ka kupetahala, kakuil ki siemba sa Hae.

<sup>12</sup> Mwa simu ya Edeni, sibi neli sesinde hahulu konji mane ha si to ebelezizwa Eva kuzwa kwa kuluka, kutaha kwa sibi. Mi mwa simu yeswana mo ne kuna ni kota ya Bupilo, nekuna ni kota ya lifu hape.

<sup>13</sup> Ne lu ka liziba kacenu kuba mulao o lwanisana. Kuli, fo kuna ni bunde, kuna ni bumaswe; fo kuna ni ze lukile, kuna ni ze fosahalile. Mi haluna ni kamuta, hakuna taba kamba sibaka sa luna sicwani, haluna kukona ku itutula kwa kubateni kwa lika zepeli zeo. Kakuli, Paulusi naize, “Fo Ni batela kueza bunde, kuna ni bumaswe fakaufi.” Muezalibi haana kukona ku itutula kuzwa ku Mukreste, ni yena Mukreste kuzwa ku muezalibi. Ku kaba paki wa ze lukile, ni bupaki bwa ze fosahalile, kamita. Mi u ikezeza keto ya hao. U lukela kunga neku leliñwi kamba lani.

<sup>14</sup> Kono mwa bana bababeli baa, kinto yenca ku ziba kuli, kale ba si ka pepwa mane, bubelli bwa bona ki peu ye swana, ye zwile ku Isaka, yene li ya sepiso. Cwale, tuto ya luna ki ye telele nyana, mi Ni bata kunga hahulu zeñata za makalelo kuli mane mukone kubona handende ze Ni ambola. Mi mwana wa pili wa mushimani, Esau, yana pepilwe; lu fumana kuli ne ba sa hoani fela ni kulwani mwa mba ya maa bona, kono ne ba zwile ku yena, inge ba lwana, Esau ha zwa, ni Jakobo inza mu swalelezi kwa lisito. Mi ba sa lwana ni cwale.

<sup>15</sup> Mane kuli, mo ne li kona kuzwelela ku ze petehile, ko ku kenile, ko ku ketilwe, ka kukena, kwa ndate ni me baba lukile bani! Kona kuli ka ku li tomahanya, kuli, Mulimu ubiza ka kuketa. Ku lukela kuba cwalo. Hakuna taba kamba bomaho ni bo ndataho ki babande cwani, mo ne babezi babande, mo ne ba bezi Bakreste bo ndataho ni bomaho, li sa siyalela ku wena ka wena unosi, mayemo a hao fapila Mulimu. Tuto ye iluta kuli,

bona, bana ba babeli bani, mane neli ka kukekwa ni ka kubizwa ki Mulimu, ndate ni mahe, musali wa mwalyanjo ni muuna ya kenile, ya na ti lo fita fafasi ku to ba peu ye tilo tahisa Jesu Kreste. Na pepilwe ali sina ya zwile kwa bafu. A li kiwa, ndatahe fapila hae. Mi a sepiwa, kuya ka peu ya Isaka ye, kuli lifasi kaufela ne li ka puluswa. Mi kuzwa ku muuna ya cwale ka yena, mi mali a hae ali a kenile hahulu kuli Mulimu na si ka lumeleza nahaiba Mafilifita a swale mahe, kasamulaho wa Abrahamama ku mufa ku yena. Mulimu na natile koto ndu ya hae, mi ali, “U swana sina mutu ya shwile,” kubuluka mali ani ali a kenile. Mi Rebekah yani, ya lukile, ya kenile, me ya lumilwe ki Mulimu mi ya bizizwe ki Mulimu. Mi kuzwa kwa peu ye kenile yani kwa taha mukwenuheli ni mulumeli. Mwabona? Konakuli li iitingile mwa pizo ya Mulimu, Kuketa kwa Mulimu.

<sup>16</sup> “Mane ku si ka pepwa kale ni yomukana wa bona, Mulimu ali, ‘Ni latile Jakobo mi Ni toile Esau,’ kusika pepwa kale ni yomukana.” Kona kuli luna ni kuikutwa cwani. Mutu yana ni Mulimu ha ambola ku wena ni ku kumena kuli utathe kwa tafule ya Hae ni kwa Ndu ya Hae, ni kuba mwana Hae wa mushimani kamba wa musizana, hakuna nto yetuna sina yeo.

<sup>17</sup> Bashimani ba babeli bao, haiba luka lemuha sibupeho sa bona, alimuñwi wa bona neli mutu wa moya, yani neli Jakobo. Mi mutu wa nama neli Esau. Kono sibeli sa bona neli ba bulapeli. Mi ona nto yeswana yani itahile kushetumuka ni mwa lusika lo na loo, za nama ni za moya.

<sup>18</sup> Esau na yemela mutu wa lifasi, wa nama, ya tamehile kwa bulapeli, kono na sa koni. Ne li siyo ku yena kuli aeze cwalo. Na palelwa ku lieza. Ne li si yo ku yena kuli asiye lika za lifasi, nto ya sika.

<sup>19</sup> Kono, Jakobo, ne li fela nto yebunolo kuli aeze. Cwale, Jakobo, mulelo ulimuñwi wa na nani Jakobo, mi wani neli kuli na bata katata ona tukelo ya sipepo yani, hakuna taba ka mwa na ka ingela, neli fela kuli aikungele yona.

<sup>20</sup> Mi ona ona moya wa kupepwa kulikumumu kwani u sa bonahala ni mwa lifasi kacenu, mi utaha kwa kuba toho cwale: ki mulumeli wa moya; ni mutu wa nama, mulumeli wa nama. Hakuna ya kona kubulela kuli ne ba si balumeli. Nebali ba bulapeli. Ne ba si ka bulela kuli yomumu na lapela “milimu” mo yomuñwi na lapela “Mulimu.” Bubeli bwa bona neli batanga ba Mulimu.

<sup>21</sup> Cwale, muiseze ngana kwateni ka tokomelo kwa Mañolo cwale fa tuto ye, kakuli Ni ziba hande kuli aka mi tusa. Mwabona? Cwale, “Ha ki mutu kaufela ya li, ‘Mulena, Mulena yaka yo kena, kono ki ya eza tato Ya Ndate yakwa Lihalimu.”

<sup>22</sup> Cwale haiba mu lemuha, Jakobo nana ni nto iliuñwi ya na bata, kakuli, kuya ka Linzwi, limbuyoti ni li—li lika zende ne li ipatile mwa tukelo ya sipepo. Mi, Jakobo, wani neli ona fela

mulelo wa hae, nto fela yana bile ni yona mwa muhupulo wa hae neli “kuamuha buhulu.” Mi Esau a bu nyaziseza. Yena yana busweli, abu nyaziseza, kamba na buswabela. Kono Jakobo na bu lila meeto teele hakuna taba ka mwa na ka bungela, na bu bata hakalo.

<sup>23</sup> Kona mo kuinezi ni mulumeli wa moya kacenu. Haana taba kamba u mu seha cwani, kamba u mu bona bukuba cwani, ka mwa lukela kuezeka mikwa ya kusialela ka ngana ya nama. Tato ya hae fela yena ki tukelo ya sipepo ya buhulu. U bata kufita ku Mulimu, kakuli li pepilwe ku yena. Hakoni ku ikambusa zona.

<sup>24</sup> *Jakobo* utalusa “kuluku” kamba “lilendele.” Kono kasamulaho wa kutaha bukau fi ni kuswala sipepo sa buhulu bwani, a cinciwa. Yeo kona cincheho, ya nama. Na ti lo bizwa ksamulaho kuli, Jakobo, ali “nabo ni Mulena,” ya na mangani ni Yena.

<sup>25</sup> Mulumeli wa nama kacenu, “Oh, haibile fela Na yanga kwa keleke ni kueza ze lukile, ki shutano mañi ye liteni?” Seo kona sikwata sa Esau. U sa eza lisheha ni ku nyaziseza buhulu bwani, Ha na taba ka bona. Kono Jakobo a bulata.

<sup>26</sup> Mi muuna wa moya kacenu, ni musali wa moya, ya ketilwe, ya lemuhilwe kale ki Mulimu kuli atahe kwa Bupilo Bobusafeli, haiba una ni kulekisa sika kaufela sa luwile, haiba una ni kuzwisa libizo la hae mwa buka ya keleke kaufela yeli mwa naha, niteni u ka kumalela kwa buhulu boo. Kona fela nto inosi yeli butokwa taba yena, “kuikungela fela ona buhulu bwani,” ku felile. Hakuna taba kamba ki cwani, ki siyemo mañi sa lukela kutaha ku sona, haiba una ni kufita fafasi kwa katala mi a lile, boo-hoo, haiba una ni kumata mata mwa—mwa—mwa libaka ni kukuta ku yo lukisa litaba, ni kulekisa za luwile kaufela, kamba—kamba kufanisa lika kaufela za luwile ni kuba muyambaeli ni muenyi, zeo halina taba. U bata buhulu bwani. Ki zona fela za tabela, ki buhulu. Cwale, musike mwa nyazanga batu bao. Hakuna mo ba kona kuezeka. Ne ba supelizwe kueza ona zeo, ba ketiwa ku zona.

<sup>27</sup> Mi cwale lubona kuli bababeli baa, batu ba nama ni ba moya, kona mo libile li ezahalelanga ona cwalo kamita. Kona mo kuinezi ni kacenu. Kamita kubile ona cwalo.

<sup>28</sup> Kaine ni Abele. Mwa simu ya Edeni, fani Edeni ha ibupiwa, nekuna ni likota zepeli kuli mutu aikungele keto ya hae. Yeñwi, yaba ya butali; mi yeñwi, yaba ya Bupilo. Nekuna ni bashimani bababeli, Kaine ni Abele, bubeli bwa bona neli ba bulapeli. Alimumu wa bona a lakaza Bupilo Bobusafeli, mi a fa sitabelo ku Mulimu, ka tumelo, ili sitabelo se si kateleha luli kufita sa Kaine. Mufuta o petehile wa likeleke kacenu: ki keleke ya nama, ni keleke ya moya. Mi hakuna kukakanya kono likwata zepeli ze Ni ambola zeo liteni ni cwale, mi mwendi ka tepu lu ka ambola kwa likitikiti ze mashumi za bona.

<sup>29</sup> Kono, mutalime, keleke ya nama, ki keleke fela ya butu. Ha ba koni kufita fahalimwa lika zani zakuli “Ni ikopanyize kwa keleke. Haiba Ni ya kwa keleke, haiba Ni eza zende ze Ni kona, ki zona fela za tokwa Mulimu.” Cwale, yeo kona nto yeswana yana ezize Kaine. Na ilo cahela katala. A eza sitabelo, atisa miselo ya naha. Mi ki hali, “Ki ze fa, Mulimu. Kona zende ze Ni konile kufumana. Li inge kamba lisiye.” Cwalo kona mwa lumelela mulumeli wa nama kacenu. “Mulena, Ni ka ya kwa keleke. Ni ka ikopanya kwa sikwata se sinde se Ni kona kufumana. Ni ka lifa liswanelo za ka kwa keleke. Ni ka eza ze lukile. Cwale, zeo kona zende ze Ni kona kueza. Ni ka lika kulekela mbelwa mashala. Kamba, Ni kafa bana liapalo.” Zeo li lukile, hakuna ze lu nyaza ka zona. “Kono kona fela ona zeo kihona, ku felile. Haiba Wa li bata, ikungele zona; haiba ha U li bati, U itulele usike wa linga.” Cwale, wo kona mubonelo wa keleke ya nama kacenu.

<sup>30</sup> Kono keleke ya moya! Abele, ka sinulo, ka muhau, na bonezi fahule kufitelela, mi ka tumelo a fa sitabelo ku Mulimu se si kateleha kufita sa Kaine. Mi sa paka za kuluka kwa hae, Mulimu.

<sup>31</sup> Nto ye swana yanga sibaka mwahala Ishimaele ni Isaka. Yomuñwi neli wa nama, mi yomuñwi neli wa Moya. Alimuñwi, wa musali wa musike; alimuñwi, ki wa musali ya lukuluhile.

<sup>32</sup> Ne ku ezahalile nto yeswana mwa Isilaele ni Moabi, likeleke zepeli zetuna litaha hamoho. Mi cwale Isilaele hana bata kuya kwa sibaka sa hae sa sepiso, keleke ya moya, sicaba sa Jakobo, Isilaele mwa musipili; sicaba sa Esau sa ba katanyeza, Moabi, keleke ye mata. Mi muzamaisi yomutuna wa keleke, Balaami, ataha ku to kuta munyana hae, kono a fumana kuli a palelwa kukuta munyana hae. Na palezwi, ka meeto a hae a bubofu, ku bona mulelo o lukisizwe, kuli, mane ni kubona Linzwi la Mulimu.

<sup>33</sup> Pili, “Tumelo itaha ka kuutwa, kuutwa Linzwi la Mulimu.” Kipeto mulumeli ha Li utwa, wa Li lemuha, mi uba ni kezo ka Lona. Mutu wa nama fela u ka Li utwa, muhuwo wa Lona, kono hakuna. . . *Kuutwa* katalusa ku Li “utwisisa”. Ku talima, ki kulubukela sika; kono *kubona*, ki ku si “utwisisa”. “Kwanda kuli mutu a pepwe sinca, hakini kubona kamba ku utwisisa Mubuso wa Mulimu.”

<sup>34</sup> Cwale, ki ha kutaha Isilaele, ataha ni sepiso ya Mulimu, kuli ne ba libile kwa naha ya sepiso. Isiñi baba sa zibi za bulapeli, kono balumeli, balumeli ku Mulimu yaswana yana bile ni yena Isilaele, ataha ku to lika kukuta munyana hae, kakuli na bulela kuli munyana hae, luli na si ya lukile kakuli na ezize lika zeñata ze maswe. Kono, mwa bona, a palelwa kubona keto.

<sup>35</sup> Ki nto yeswana ni Esau ni Jakobo! Esau na bonahala inge muuna yomunde. Na inzi mi aeza lika za sishemo. Na—na babalela bo ndatahe ba macembele ba libofu, ku ba zumelanga

nama ni ku ba babalela, mi neli mushimani yomunde. Lika zeñata ze ba ezanga balumeli ba nama mwa mayemo a bulapeli, za kutuza tutengo, ni—ni kulifa mitelo ya batu mwa lipatela, ni lika za bulapeli, kono zeo ha ki zona ze Ni ambola.

<sup>36</sup> Moabi neli yomunde, naha yetuna, muzwale wa hae. Mi Jakobo na sa ezize kale lika kaufela, na bile mukwenuheli; kono niteni na bile ni nto iliñwi yana bata kufumana, yani neli kuamuhela sepiso yani, ona buhulu bwani. Ki ha kutaha Isilaele, bana ba Jakobo, ni lika zeswana ze ne ba bata. Cwale ki mañi ya kaba ya lukile?

<sup>37</sup> Balaami na yahile tutala to tu supile; mwa Isilaele nekuna ni tutala to tu supile. Balaami na file litabelo ze supile za libatana zekenile; Isilaele na file litabelo ze supile za libatana zekenile. Kwani, kuya ka mo ne ba lingela za sizo, Moabi ka kuba wa bulapeli hahulu sina Isilaele mwa na inezi, Esau neli wa bulapeli hahulu sina Jakobo mwa na bezi, mi ni Kaine neli wa bulapeli hahulu sina mwa na bezi Abele. Kono, ki kuketwa kona ko ku swala lika.

<sup>38</sup> Ha ki bubofu ni boo! Ha ki bubofu ni boo kwa bana ba Esau, kubulela ka moya, ma Moabi, ne ba keshebisa Isilaele ni kubulela kuli, “Mu ba bone koo. Ha ki kopano. Ki sikwata sa bakwenuheli. Ba pila mwa litende. Mi lu naha yetuna. Ba ezize bumaswe. Mi habana kopano ifi mwahala bona. Basweli fela ku minyauka kafa ni kafa, ba latelela mupolofita.” Kono a palelwa kubona Noha ya Kopa ni Licwe le li natilwe fapila bona. A palelwa kubona sikwata se si bizizwe sani, sene si latelela mulao wa Bumulimu o tomilwe ki Mulimu wa kuliba kwa naha ya sepiso.

<sup>39</sup> Kona mo kuinezi ni kacenu. Ba bulela kuli, “Ki sishañata sa bapikuluhu ba bakenile. Ki sishañata sa batu baba swana sina *se, sani*, kamba *sesiñwi*.” Kono ba palelwa kubona kuli ki kulatelela tamaiso ya Linzwi la Mulimu.

<sup>40</sup> Isilale nali mwa musipili wa hae kuya kwa naha ya sepiso. Mulimu, mwa Linzwi la Hae, na file sepiso.

<sup>41</sup> Jakobo, libaka la na ketezi kufumana buhulu bwani, ka mukwa ufi kaufela, na bata kuikungela bona, kakuli na ziba kuli buhulu bwani ne buna ni sepiso. Ne bu sweli bupilo. Na sina taba ka mo ne bukatela, fela neli kuli aikungele bona. Yani neli yona nto ya butokwa. Kamba ne bu ka taha cwani, nekusina butata. Na bu bata. Mi kupale kumane una ni kuba ni bona. Mi a ikungela bona. “Mbuyoti ki ya baba na ni tala ya kuluka, ba ka kuliswa.” Na li fa musipili wa hae, mi na bu bata ka tata, mi a bu amuhela.

<sup>42</sup> Isilaele nali mwa musipili wa hae kuya kwa naha ya sepiso. Hakuna taba kamba ma Moabi neli ba bakai ni likuto ze ne balika ku ba selaela zona, ba ya fela kukena mwa naha ya sepiso.

43 Mi kacenu hamuna . . . hakuna taba kamba baka ba ni mulao okuma kai, kamba ki kukena litolongo zekai, kamba ki manyando akuma kai, kamba ki litaba zekai ze maswe ze ba bulela, kamba ba ka ba biza linako zekai kuli “mupikuluhu ya kenile,” linako zekai ze ba ka bulela lika zemaswe, keleke ika zwela pili. Ina ni kuzamaya. I pila mwa Linzwi la Mulimu.

44 Nako yeñwi malena bababeli ne ba tile hamoho. Alimuñwi wa bona neli Akabe, yanali ya maswe, yomuñwi neli Jehoshafati; keleke ya moyo, keleke ya nama.

45 Akale neli mulumeli wa sihalihali. Nana ni bapolofita. Ne ba si baba sa zibi bulapeli. Ne ba si balapeli ba milimu. Nebali bapolofita ba ma Isilaele, kono ne ba lutilwe kaufela bona ni kufepiwa ni kutinisiwa ki mulena Akabe. Za to ba sina sibaka kone bana ni ze ba yemela za Inaha hamoho.

46 Jehoshafati ataha mwatani, inza shetumuka cwalo, apanga bulikani, yeneli nto ye maswe.

47 Ha mu lukela ku iswala bulikani ni baba sa lumeli. Ha lu swaneli kueza cwalo, kube cwani kamba cwani, kamba kubeya mabizo a luna mwa likeleke ze sa lumeli mwa Evangeli yetezi. Mbamba! Mu ka kena mwa butata.

48 Mi bona ba kena mwa butata. Mi muuna ya lukile yo ali, “Kana lusike lwa buza Mulena pili, mi lufumane haiba lu lukela kuya kwa Ramoti-Gileadi naa?”

49 Cwale amutalime litukiso mo ne li bezi ze lukile. “Ramoti-Gileadi ki yaluna. Ki sibaka sa luna, mi ma Syria ba ikungezi yona kuzwa ku Mulimu yapila. Lutokwe kuyo ikungela naha yee?” Mi alukisa ngambolo ya hae kuba ye munati hahulu, mane ye zamaelela ni mulao hande, mi ye lukile luli, kufitela Jehoshafati a wela ku yona.

50 Mi, kacenu, baana bakona kuyema fa katala ni butali bwa kuziba kubulela, mane ni tuto, kufitela mane bakona kutatulula Mata a Moya o Kenile kushutana ni Bibe. Bakona kutoloka foliso ya Bumulumu musili. Ba kona kutatulula za kubulela ka malimi ni kutoloka, bakona kutatulula kolobezo ya Moya o Kenile, kuisa habusa.

51 Kono mutu ya ketilwe ki Mulimu, mi mutu . . . “Lingu zaka liutwa Linzwi la Ka.” Muna ni keto ya Mulimu fahalimwa mina, halina ku mi sitatalisa.

52 Jehoshafati ali, mulena lukile ali, “Kana hakuna mupolofita, ye lukona kubuza Mulena ka yena?” Akabe nasweli kuya sina zeo.

53 Kona mo isweli ku ezeza keleke ya nama kacenu. Oh, bana ni mikopano yetezi bakutazi, baana babatuna, muika yomutuna, ya butali, sikwala, wa bunangu, oh, mawi, fahule ni—ni ngana ya keleke ya na- . . . kamba keleke ya moyo.



54 Mwa mazazi a Nuwe, mwa mazazi ani, mutalime fa keleke ya nama. Nebali sikamañi? Batu ba sayansi, bayahi, baana baba butali. Kono baketwa, bo Enoke ni Nuwe, nebali balisana ni linjimi, babotana, baba si ka ituta, isi baba butali, kono ne ba ziba Mulimu wa bona; sesiñwi ku bona, ne si zamaya, ne si biza. Lu ka fita ku zeo kasamulaho nyana.

Cwale, kacwalo Jehoshafati ali, “Kana hakuna mupolofita?”

55 Oh, eeni sha, wa nama una ni zona. “Kiniti, luna ni zona. Nina ni mukopano wa za bulapeli kwanu, buñata bwa bona.”

56 Atisa baba mianda yemine. Cwale, bao ha ki baba sa zibi za bulapeli. Ki balapeli ba Jehova-Mulimu. Baba tile, mi se bali, “Ha lu libeleleni fela hanyinyani lu ka polofita.” Mi kacwalo kaufela bona bataha hamoho. Mi ba to kuta ni, “Linzwi la Mulena,” mi se bali, “KISONA SA BULELA MULENA.” Bapolofita ba Isilaele. “KISONA SA BULELA MULENA. Zamaya u kambame, Mulena una ni wena. Mi u ka yo hapa Ramoti-Gileadi, kakuli kaniti ki ya Isilaele.” Mi alimuñwi wa mantuna amu ezeza manaka amabeli amatuna a sipi, ka kuba sisupo, mi alakala ku kasha inge ya pumba. Ki hali, “Ona cwana kona mo ka pumbela Isilaele. . . kamba kupumba ma Syria kuzwa mwa Ramoti-Gileadi.”

Kono, Jehoshafati, nekuna ni sika ku yena!

57 Oh, Ni sepa kuli Mulimu akenye lika ze mwa lipilu za mina. Ha ki sika so kona kuitalifisa ili wena ku sona. Ha ki so kona kuziba ka kuipalela sona. Ki seo Mulimu, ka kuketa kwa hae, a ku ezelize kale. “Ha ki ya mata kamba yena ya bonisa- . . . Ki Mulimu ya bonisa sishemo.”

58 Jehoshafati ali, “Ki baana baba tinile hande.” Ha ku kakanyiwi kuli na bulezi sina cwana, “Ba talifile, mi ki baana baba itutile hahulu ku be Ni kile na utwa fateni. Ba itutile mane kufita ku za nako ya cwale. Mayemo a bona ki kutwano. Bana ni swalisano yetuna mwahala bona. Mi ba butali, mi bana ni Niti mwahala bona.”

59 Buhata kaufela buna ni Niti. Buhata bobutuna kufitisisa bo bu kile bwa bulelwa nebuna ni nanite- . . . [Hakuna manzwi fa tepu—Mu.] pesenti ye Niti ku yona, boo ki buhata bwa kile abulela Satani ku Eva.

60 “Oh, ki Niti yeñata hahulu ku ze ba bulela, kono kikuli hakuna yomuñwi hape nji?”

61 Kihande, mu nahana kuli muuna yani na bulezi sikamañi? “Inge lu nani baba mianda yemine fa, baba talifile mukwazo, baika babande? Ha ba yo kwande inge ba mata mata mapunu licika, bali kuitama matalo a lingu, kamba nto yeñwi. Ki baana bo Ni fepile, Ni ba lutile. Ha ki baana baba sa zibi ma ABC abona. Ki baituti, mi ba ziba nto yelukela. Ba inelela, musihali ni busihu, banze ba bala matapa ni sipolofita. Ba ziba se si lukile.

Ni ba ni bona kale. Mi ba yemi fa mwa buñwi, ki baba mianda yemine, bali, “Zamaya u kambame, Mulena una ni wena.”

62 Kono hane Ni ka bala minahano ya Jehoshafati fa mizuzu nyana, “Kuna ni sesiñwi se si sa utwahali hande,” na ka bulela kuli. “Kuna ni fela sesiñwi se si sa bonahali hande. Kanti kona kuli hakuna neba alimumu feela, kokuñwi?”

63 “Oh,” ki hali, “eeni, kuna ni alimumu yaliteni, kono ha ki wa kopano ye. Yena ki mucaha ya shutana. Ki mukwenuheli fela ndate.” U swana sina Jakobo. “Lwa kona ku mu buza. Ba li ni yena ki mupolofita. Kono Na kakanya bati, kakuli ulata hahulu ku ni kutanga, ni kubulela *se, sani*, kamba *sesiñwi*, kamba mane a polofitangi zende ka na mucaha wateni bati.” Na ka polofita zende cwani? Mwabona?

64 Kona kuli se bali, “Ha lu yo munga. Ki mwana Imilah.” Kacwalo ba yo mu nga.

65 Mi yomuñwi a mu katana mwa nzila, ali kuyena, “Cwale, u bulele litaba ze swana. U lukela kulumelelana ni ba katengo. Haiba u sa lumelela ni bona, bumai ki bwa hao!”

66 Yena ali, “Ni ka bulela fela Mulimu sa ka beya mwa mulomo wa ka kuli ni bulele, mi isiñi nto isili fela.”

67 Mi amano fita kwani, ba mu fa busihu bulibuñwi, ki hali, “Zamaya u kambame, kono Ni bona Isilaele u hasani sina lingu ze sina mulisana.”

    Mi Akabe ali, “Ne ni si ka ku bulelela?”

68 Cwale, ki bao mianda yemine kulwanisa alimuñwi. Mianda yemine baba laezwi, baba butali, baba itutile, baana ba ngana yetezi kukangisana ni mutu alimumu wa sitimbi, sina mo ne lu ka mu bizeza, Mikaya. Muuna alimumu, kono nitefi yena muuna alimumu yani nana ni Linzwi la Mulena, sani kona sene sili shutano. Mañi ni mañi wa bona nali lihata, ne li bonahalile kuba buhata. Ki kabakalañi Mikaya ha na li ya shutana cwalo? Kikuli nana ni kuba mubonata, kuli abe ya shutani? Batili. Mu. . . Se ne si shutanisa Mikaya, na pila ni Linzwi. Linzwi la Mulimu kona la na pilile ni lona.

69 Cwale ku sepisizwe kuli, mwa mazazi aa, “Mulimu uka sulula kwa Moya wa Hae.” Li sepisizwe ki Daniele, kuli, “Sicaba, mwa mazazi ao licwe ha li ka nata siswaniso kwa mahutu, batu baba ziba Mulimu wa bona ba ka eza ze komokisa.” Sipolofita mwa mulaho wa sipolofita! Mi ni mikopano kaufela ya bukutazi, ya lifasi, haikoni ku li zweisa. Mulimu ki yena ya ka li eza, nihakuli cwalo, mi sicaba si ka li latelela. Mwabona? Za nama ni za. . . Keleke ya nama ni keleke ya Moya. Mwa bona, Linzwi kona le li shutanisa lika.

70 Ona zeo kona za na hupuzi Jakobo, “Mi hakuna taba kamba ki cwani, Ni ziba kuli ha Ni koni ku fuyolwe konji ha Ni ka

amuha buhulu bwani. Ona buhulu bwani kona bo Ni lukela kuswala.”

<sup>71</sup> Mi, kono Esau na butoile, ni bana ba hae baeza lika ze swana, niteni, kufita ni lizazi lee. Ba bu toile. Kubile cwalo kamita.

<sup>72</sup> Nako kaufela hakuba ni ancafazo, ipepanga mabile nako kaufela. Ao ki manzwi a maswe, kono ki niti. Hane kubile ni kupepwa kwa, Isaka ni Rebekah, ne kutahile mambile. Fani lifasi ha li bupiwa, la pepa mambile, likota zepeli. Mi hape Kaine ni Abele hane ba pepilwe, ne ba tahile bababeli. Fani Ishimaele ni Isaka haba pepwa, ne li papile bababeli. Mi hape Esau ni Jacob ha ne ba pepilwe, ba pepwa bababeli. Alimumu wa bona, neli wa nama (alimumu wa bona, wa lifasi); haili yomuŋwi, neli wa Moya. Mi yo atalima ku wa nama, wa ngana ya butu; kono yomuŋwi za zamaya ka Moya. Kamita kubile ona cwalo. Ha ku taha keleke ya ba Lutheran . . .

<sup>73</sup> Ha lunge ya Pentekota, pili. Amutalime fa kupepwa kwa ma Pentekota. Ne li tisize ancafazo yetuna, ye mata ye ne kwanile lifasi le lu ziba, ka Pentekota. Ne ku si ka fita nako yetelele kuli Paulusi abulela, kuli, “Kukaba baana baba ka taha mwahala bona, ba lituto ze kopami, mi ba ka keluseza sicaba kwahule ni Mulimu.” Mi ona seo kona zene ba ezize fela. Ne itisize zepeli.

<sup>74</sup> Keleke ya ba Lutheran ha ipepwa, Martin Luther atisa ancafazo ya moya. Ne ku si ka fita nako yetelele se ku taha Esau, mwa mulaho wa hae, mi a ikonga konga. Mi ya pepa zepeli.

<sup>75</sup> Mi kasamulaho wa sani, kwa taha Methodist, John Wesley, ancafazo ya moya. Kuzwa fani, kwa taha kopano, ya li kopanya kopanya. Mi ya pepa zepeli.

<sup>76</sup> Mi kuzwa fani, kwataha Pentekota, neli ancafazo. Mi cwale ba li onga ongile, mane fa se bainzi fafasi kuba kopano. Mi itisize zepeli.

<sup>77</sup> Kono peu ya moya yani ya Mulimu yapila, ya hupula kuli neina ni kuba muyambaeli, ni ha ina ni kuba muikamaeli, itisanga kauhano nako kaufela. Esau na si ka ina nako yetelele hahulu ni Jakobo. Ona fani fela Jakobo ha to amuha buhulu (kulumbwe Mulimu), za biza kauhano. Mi haiba mutu . . . Hanina taba kamba u wa keleke maŋi, haiba ki ya nama, ni balika bo fumaneha ni bona, batu bo bapalanga makadi ni bona, ni tutengo twa libuka za hap, ni zeŋwi cwalo; ha u amuhela tukelo ya buhulu, sona sika se si mwatasi a pilu ya hao se si shukezi Mulimu, ha u amuhela sani, sika ku tiseza kauhano. “Amuzwe mwahala bona, mi mu kauhane, kubulela Mulimu.” Kauhano!

<sup>78</sup> Keleke ika ina fafasi. Mwabona, haikoni kuzwela pili. Esau nali mufuta omunde luli wa mulumeli wa nama kacenu, ya sa koni ku koma lifasi. Ha komi lika za lifasi. U sa tabela za mikiti ya hae, mibinelo ya hae, mipende ya hae ni milomo ni, za basali, kwa lifateho za bona, mi—mi ni kukuta milili ya bona ni—ni kutina liapalo zekuswani zani; mi—mi ki muuna ya tabela

kuzwela kwande kwa kubapala pool, mi—mi ni kuzuha makwai, ni kubulela makande a lisheha la masila; kono niteni abe wa siemba sa keleke. Ha koni ni hanyinyani ku koma lika zani. Ni yena Esau na palelezwi. Kono niteñi, ku ba wa bulapeli, nana ni kuina fafasi kutaha fa mubonelo wa nama. Ki yona nto yeswana ye li eza likelek kacenu. “Lu kaba kopano. Lu ka ikopanya ili luna hamoho. Lu ka eza lusika, kamba ka kutwana, kamba nto ye cwalo.”

<sup>79</sup> Mi cwalo kona keleke mo izamaela kacenu, za moya ni za nama, li sa li ze swana. Ha li si ka cinca, mi halina ku cinca ni kamuta.

<sup>80</sup> Kukena kwa Mulimu. Mulimu, kakuba Mulimu, u bonisa kuli, Yena kasibili. Haiba kuna ni muezalibi, haku koni kuba. . . Na si ke kuba Mupulusi. Kono Na li Mupulusi kwa simuluho, kona kuli ne ku sina se ne si latehile. Mi ni maikuto a Hae Luli akuba Mupulusi, a bonahalisa muezalibi, ne ku lukela kuba ni se si na ni ku piliswa. Ku si kaba kale sika sa kupilisa, ne ku na ni ku ba sika se si latehile. Ni kuluka kwa Hae ni kukena kwa Hae! Kambe ne kusina mutu yana—yana kula, Na si ke kuba mufolisi. Kono kuzwa kwa simuluho, ni kwa makalelo a kale, Nali teni kusikaba kale simuluho. Na li mufolisi. Kona kuli nekusina se ne si kula, kona kuli ne li bonahalize mutu ya kula, kuli Akone ku ba folisa, kuli Yena abe mufolisi.

<sup>81</sup> Kuzwa ona mwa Sibaka se si swana se si Kenile sani kafoo kwa taha puluso, kwa taha likuto. Kuzwa ku mahe ni ndate ya swana yana pepile Jakobo, kwa zwa ni Esau. Mwabona? Ki Mulimu. Hakoni kucinca mulelo wa Hae. Bana ni kuya ka kuswana fela. Ze bupilwe kaufela li ka likanyisa mwateni. Lina ni kuba cwalo. Mwa utwa ze Ni talusa? Za kena mwateni. Ku lukela kuba mutu ya ka lateha, kuli apiliswe. Mi kambe ne ku sina ya cwalo, Yena, za Hae. . . Yena ha li Mupulusi yana li ezize. Buliba bu bizana ni Buliba.

<sup>82</sup> Sina mushimani yo Ni bulelanga nako kaufela, yana canga mutakulo kwa lipotoloto, ni mahatelo a njinga ha mucoba, na tokwa sulfur. Mi haibile ne kuna ni sika mwahala hae se ne si nyolelwa sulfur, nekuna ni kuba ni sulfur kokuñwi, pili, ne ipangilwe. Nekuna ni kuba ni sulfur a si ka ba kale ni linyolwa la yona. Mi ki, yona sulfur, yene mu bonahalisa, mi kona a kutela kwa sulfur.

<sup>83</sup> Kona nzila Mulimu mwa bezi Mupulusi cwalo. Mi nekuna ni kuba sika se si latehile, kuli A si pilise, kuli Yena abe Mupulusi. Kona fela ze sweli kuezahala, ki kuitinga fela ku Mulimu. Lika kaufela, kaufela li ku Yena; isiñi ku mukutazi, isiñi mwa keleke, isiñi mwa katengo, kono ku Mulimu, kuli kuketa kuyeme ka bupetehi. Mwabona? Li ku Yena. Eehe. Ba Lutheran. . .

<sup>84</sup> Mi hape lu bona kauhano yeñwi, yani neli Abrahamama ni Lota. Nebali muzwale hamoho. Kono Lota nali mutu ya nahana za

nama. Na li mutu za bata bata hahulu lika zetuna, sika se sina ni milangu yemiñata ku sona. Kuswana fela sina njoko, sina ha Ni kona kubulela kuli, kamita ki kubata lika ze benya. Moya wo hausika siya sicaba, kacenu. Ba ka bata bata . . . Ba ya kwa tolopo, mi haba koni kutaha kwa kashandi kakaswana sina ka. Mwabona? Ba bata keleke yetuna kufitisisa yeliteni mwa tolopo, mulisana ya bonahala hahulu kuituta, ko kuyanga sicaba se si ziba kutina hande, ko ku yanga mubusisi, wa tolopo. Isali ona moya wa Esau wani. Luli nana ni buhulu, ka kukala, ba ipiza kuli ki Keleke, kono ba li letehisa kakuli ba Li keshebisa. Ha mukoni ku eza kuli batu bani ba ye fa mañwele a bona, ni kulila kukupa ku Mulimu, ni kuzwela kwande ba be ni sebelezo ya kufolisa, ni kuyemela manyando a lifasi, ba amuhele Moya o Kenile. Mi haba—haba na kueza cwalo. Ba li nyaziseza. Ba li biza kuli “ki sishañata sa bapikuluhi ba bakenile.” Ona cwalo mo i bulelezi fela Bible kuli kona mo ba ka ezeza. Ba eza cwalo kakuli kona sibupeho sa bona. Ki sibupeho. Inge maankoli ni liiba, libupeho zepeli. Ba li tokwa kakuli kona se ba li sona. Habana kuba ni kamuta (mbamba) ba bone lika zeñwi, kakalu ha ba si ka pepwa kubona zeo.

<sup>85</sup> Mi yomuñwi, hamukoni ku mu hanisa zona, kakuli ki kuketa kwa Mulimu. U pepilwe kuba muuna wa moya kamba musali wa moya. Kuna ni sesiñwi ku yena se si li bata. Oh, Ni—Ni sepa se si fita fa sibaka fo lukona kuba, mwa kona kubona se Ni—Ni talusa, ka kusi kwahela kwateni. Cwale Abrahamama . . .

<sup>86</sup> Muhupule, haibile fela ne ba ikeza bulikani hamoho, keleke ya nama ni keleke ya moya, ne i si ka amuhela mbuyoti. Jakobo na si ka fuyolwa konji ha to kauhana ni Esau. Mi Abrahamama na si ka fuyolwa konji ha na kauhani ni Lota.

<sup>87</sup> Lota nana ni mikopano ya litapelo nyana za hae mwa keleke ya hae kafani, aluta bana ba hae ba bashimani ni basizana, ni babañwi. Kono na pila bupilo bwa kuli, kufitela, ha ka kubulela za mafelelezo a nako, ba mu seha.

<sup>88</sup> Ki nto yeswana ni kacenu! Mu bulele ka za foliso ya Bumulimu ni mata a Mulimu, ni zeñwi cwalo, ba li sehanga zeo. Ki moya o swana. Yeo kona mioya yemibeli yemituna, ya bu lapeli, ina ni lifasi ku yona leli lamatela; mulumeli ni ya sa lumeli, mulumeli ni ya sa lumeli, ya sweli kulikanyisa yomuñwi. Cwale Abrahamama ha na kauhani kwateni . . .

<sup>89</sup> Kikuli mu lemuhile Jesu? Mwa kubulela za Kutaha, Kutaha kwa bubelil, Naize, “Sina mo ne kuinezi mwa mazazi a Nuwe, ba ka ca, kunwa, kunyala, ni kunyalisa.” Kono ha Na bulezi ka mazazi a Lota, Na si ka bulela sesiñwi ka ona. “Sina mazazi a Lota mwa na inezi,” zeo litokwa sinulo.

<sup>90</sup> Mu talime sene si ezahala mwa mazazi a Lota. Nekuna ni Lota kwani mwa Sodoma, inge aipilela hande, ka zibo ya nama, aketiwa kuba, alimumu wa baana babatuna mwa muleneñi

wani, aba muatuli, yana ina fa munyako ni kuatula sicaba. Musala hae na fumaneha kwa tutengo kaufela to ne tuliteni mwa muleneñi. Mi bana ba hae ba basizana, mane hamoho ni bona kaufela, ba inyalelwa mwahala baika, ba ngana ya nama, baba itutile hahulu, baba butali, mangwangwa. Mi Abrahamama a pila mwa tende mwatasa kota ya oke. Kono zazi leliñwi bubeli bwa bona ba bona pono.

<sup>91</sup> Mi nekuna ni mukutazi wa nama yana ilo kutaza kwani, ni ku ba zwiseza kwande. Mutalime fa—mutalime fa liñusa, “Amu zwe,” abulelela Lota.

<sup>92</sup> Mi na sike kubizezwa kwande kambe ne si ka sishemo sa Abrahamama. Ali, “Ha Ni ka kufumana baana baba mashumi aketalizoho nji, bao Uka ba pilisa? Ha Ni ka kufumana baana baba mashumi amalalu? Ha Ni ka . . . Haiba Ni fumana lishumi?” Kona fa na ilo feleza. Mane Na si ka fumana nihaiba baba lishumi mwahala bona.

<sup>93</sup> Ki kabakaleo, “Sina mo ne kuinezi mwa mazazi a Nuwe.” Muhupule, Nuwe ne si mufuta wa Keleke; Enoke ki yena, ya na si ka kena mwa nyandiso, kono na ngilwe nyandiso isika wa kale. Enoke aya kwa Hae, na si ka fita mwa nyandiso. Nuwe na fitile mwateni.

<sup>94</sup> Cwale, mu talimisise hande cwale halunze lu pahamisa taba ye. Mutalime mufuta wa sisupo sana filwe Abrahamama ni lubasi lwa hae. Ba amuhela za Moya za buipiteli. “Abrahamama!” Na zibile cwani kuli nali Abrahamama? “U kai musala hao, Sarah?” Kana Na zibile cwani kuli na nyezi, kamba kuli nana ni musali, Sarah?

“U inzi mwa tende.”

<sup>95</sup> Cwale, Muuna inza inzi fani, inza ca nama, kunwa mabisi, ni kuca sinkwa sa mbonyi. “Ukai, ukai musala hao, Sarah?” Na Ka ziba cwani nto ye cwalo? Na Ka iziba cwani? Mu nahane ka zona. Mu biza . . . Mina sicaba sa moya, mubone kuli taba ye ikene ku mina. Kana Na li zibile cwani zeo, kanti Na ikezize sina muenyi, ni maluli kwa liapalo za Hae?

Mi cwale Abrahamama ali, “U mwa tende, kwa mulaho wa Hao.”

<sup>96</sup> Mi ki Hali, “Ni ka ku . . .” “Na, Na,” ki tulokaandina twa mutu. “Na,” Muuna yoo, Mulimu U itibahaza mwa nama. Mulimu! Abrahamama a Mu biza Elohim. “Na, Ni ka ku potela. Ni ka buluka sepiso ya Ka. Mi kuya ka nako ya bupilo, Ni ka ku potela, mi ukaba ni mushimani yo Ni ku bulelezi yoo.” Mi Abrahamama, ali wa myaha ye mwanda; Sarah, nainte.

<sup>97</sup> Mi Sarah, ali kwa mulaho mwa tende; mwendi neli li tende ze ne zenyinyani, tende yetuna mwa hae neili kwa mulaho. Kwa mulaho kwa maandamino, na sweli kuteeleza. A ikutwela zona. Mi mwatasi a pilu ya hae a menya, ali, “Na, nili mucembele wa

myaha ye mwanda ya kupepwa, mi mulena ka,” ki muuna hae yoo, “mulena ka yena, mane u supezi maswe, ni hupule za kuba ni munyaka kukopana hamoho hape, inge babanca mwa linyalo? Oh, kauke na likona kuba cwani?” Mi a menya cwalo.

<sup>98</sup> Na sikuluhezi mukokoto wa Hae kwa tende. Ki hali, “Ki kabakalañi ha sehile?” Oh, muzwale, ki fo he cwale!

<sup>99</sup> Mutalime fa keleke ya nama ye sweli kuba ni Evangeli ku kutazwa ku bona. Ki Billy Graham wa kacenu ni kulo kwani inge ba kutaza Evangeli, “Amuzwe mwa teni!” Kono kana ne ba zwile nji? Batili. Neli fela ba banyinyani, nyani, nyani luli.

<sup>100</sup> Mutalime sikwata sa Abrahama, baba bizizwe. Cwale mulemuhe. Mi ki Ha mu fa sisupo se, mi a lumela ku Yena. Mi A likela fapila hae, ni kuya kusili. Oh, mo li bezi kamita mwa kauhano, ki baba bizizwe!

<sup>101</sup> Cwale, mioya yemibeli yee. Ka kuakufa ni mina, ka kuakufa cwale kuli ni fite fa sibaka fo Ni bata kuli mu bone. Likwata zepeli ze li bile lifumaneha bukaufi hamoho, kushetumuka mwahala masika cwalo, ku kala kwa makalelo a nako kafoo; keleke ya nama, keleke ya moya. I bile mwa Testamente ya Kale, ifitile ni mwa Testamente ye Nca, mi itulukile fafasi kacenu.

<sup>102</sup> Cwale, ka lilimo ze likana likiti zepeli kwa mulaho, za to fita kwa toho ya zona, mane za to felela mwa baana ba babeli: alimumu wa bona, Jesu Kreste; mi yomuñwi, Judasi Isikariota. Cwale, Jesu na tamahana ni za Kutaha, ona Kutaha kwa Hae kwa bubeli, kuli mioya yemibeli ye ne ika shutana hahulu kufita mo ne iinezi kwa mulaho kwani. Cwale fa kona fo Ni bata kuli muapale liapalo za mina za—za Kanya. Mioya yemibeli ye ika shutana. Kakuli, Satani na ti lo pila mwahala mutu yanali membala wa keleke, Judasi Isikariota, yana pila mwa keleke ya nama, mi nali mulikani kwa keleke ka nako kaufela. Kono a kena mi—mi apuma, kamba a hupula kuli na sweli kupuma muhulwa na hae. Ataha mi a to swanela kuba alimuñwi wa bona; atatuba lika zende za Mulimu, ba zamaelela hamoho mwa Moya, mo ne ku bonalela, a yo kutaza Evangeli, ni ku leleka mioya. Kono mwahali ku yena, ka nako kaufela, na li Judasi, ka kukala. Bibebe ibulezi kuli, “Na pepilwe ali mwana wa sinyeho.”

<sup>103</sup> Cwale muhupule, ki yeo keleke ya nama kwa mulaho kafoo, ili Esau, bao ki Bafarisi ni Basaduki.

<sup>104</sup> Kono ha mu talime mucaha yo ya nahana kuli ki. . . Uka zamaelela ni Liñusa fa nako nyana, kono fela ha lati kubeya mazoho a hae ku Lona. Mwa ibona mioya yeo? Jesu naize, “Li kaba bukaufi hahulu ni sika sa niti, li ka puma ni bona ba Baketwa,” Baketwa, haiba mu ka lemuha, “kambe ki nto ye konahala.” Kono ha ku konahali. Mwabona, li ka puma.

<sup>105</sup> Cwale amutalimele, ha ki keleke ya nama fela, yona yeliteni kwani, keleke ya mikwa ya sitwaelelo, sikwata sa Esau.

106 Fa cwale luna ni sikwata sa ba ha Judasi, ili se si sa sepahali maswe, ha ba sepahala ni hanyinyani, ba tahile mwa mazoho a swana a mbuyoti. Kuswana fela sina mwa Maheberu 6 ni 10, mwa na bulelezi kuli, “Ha se ba mano ca sanda ni kufiwa mata a kutatuba mata a lifasi le litaha, mi ba ezize lika ze kaufela; haiba. . . mi cwale haiba ba amuhezi zibo ya kuziba Niti, mi kipeto ha ba ka wa ka boomu.” “Ka kulata,” ki sikamañi seo? “Kubala Mali a bulikani, o ne ba kenisizwe ka ona, kuba nto ye masila.”

107 Ha lu boneni ni mife mutala. Ki wo fa. Ki yo muuna fa, ki mulikani yomunde, mushimani yomunde. U bizizwe, u ikutwa mwa pilu ya hae kuli ubata kuba mukutazi. Ku lukile, u amuhela Jesu kuba Mupulusi wa hae ka mulikani. Ki mushimani yomunde, hakuna mutu yakona kubulela se si maswe ka yena. Kasumulaho nyana, tuto ya kukeniswa. Muuna ubanga ni takazo ha talima basali. Yena. . . Li ku yena. Mwabona? Mi kipeto, nto yetatama, mwendi u zubile, mi ubata ku zuba. Mwendi ubata ku nuha lika ka kulaula. Mwendi ubata kueza nto yeñwi ye maswe. Wa ziba kuli ha lukela kueza cwalo, kacwalo uli, “O Mulimu, lamba Mali a Jesu ku na, mi u ni kenise.”

108 Mi kipeto wa keniswa. Wa kona kuhuwa, kulumbwe Mulena, ueza lika zeñwi, hape, u zwela kwande mi ueza nto yeñwi. Muhupule, Jesu naize mufuta o cwalo u kaba teni ka lizazi lani. “Babañata ba ka taha mi ba bulele kuli, ‘Mulena, hanali Ni polofitile, ni katalize? Hanili Ni lelekile mioya ye lunya, ka Libizo la Hao?’” Jesu ali, “Nali kuba ni mi ze mane, mina baezi ba zemaswe.” Mwabona, ki fo he cwale.

109 Cwale ha mutalimele se cwale. Lu taha kwa kueza sikusha sa manyeze a milili alikana lule lule lwa mianda, kutaha mane kupunya kwa buhali bwa mukwale wa Evangeli, “Buhali bo bu fita mukwale o lozizwe kafa ni kafa, la puma ku yo punya ni kwa makauhanelo a masapo, mi la Lemuha!” Haleluya! Mulimu, ha li zamaye mwateni kaufela. “Li lemuha maikuto a mwa pilu.” Yeo kona Evangeli, ili Mata a Mulimu. Linzwi la Mulimu le li bonahalile kona Evangeli.

Mu li, “Ki Bibeleyebulezi. Leo—leo ki Linzwi la Mulimu.”

110 Kihande, Linzwi le li bonahalile kona Evangeli. Evangeli ha isika taha ku luna ka Linzwi fela, kono ki ka mata ni ponahazo ya Moya o Kenile, ili kubonahalisa Mata, kueza kuli Evangeli ipile.

111 Hane Ni ile kwa India, bishopu yomutuna wa—wa keleke ya Methodist ataha, ali, “Bo Branham, ha lu lati kuziba sesiñwi ka za mubuleli wa linzwi. Lwa ziba zeñata hahulu za Bibeleyebulezi kufita zo ka ziba wena fateni.” Ali, “Ne luli keleke, mi lwa yaha kwanu lilimo ze likiti zepeli kwa mulaho mina mu si ka ba kale naha.” Yeo ki niti. Kono ali, “Lu utwa kuli Mulimu u ku potezi mi u ku file mpo yekona kueza Bibeleyebulezi ye kuba yepila.” Ali, “Zeo kwateni kona ze lu tabela.” Oh, mawi! Mwabona, muuna yani



nali mwana, isiñi muikulu, sina Davida ha na bulezi. Mwabona? “Lu bata ku ziba. Ki niti kana?”

112 Se nili, “Kicona, ki niti. ‘Jesu Kreste wa swana maabani, kacenu, ni kuyakuile.’”

113 Cwale, mwa mu utwa, keleke ya nama inyandisa keleke ya moya. Cwale, lu fumana kuli cwale kuli Judasi na icanganisa kuli ki muzwale, kuba muzwale, mi kona a yo fita fahule ni kutaha fa situwa fokutelele.

114 Cwale amutalimele mukutazi yomunyinyani yoo. U taha fa sibaka, u li, “Mulena, Ni bile ni talimela basali. Ha ni lukela kueza cwalo. Ni ezize cwalo, mwa ziba, ka kueza lika za lifasi. Ha ni lukeli kueza cwalo. Ni bile ni sinyeza masheleñi aka litakano za limbongolo. Hani—Hani lukeli kueza cwalo. Ni—Ni ni ni yanga busihu ni busihu kwa mikiti ya maswaniso. Ha ni lukeli kueza cwalo. Na ikolanga neba maswaniso a matapa ni lika ze cwalo, Nina ni mapepa a mamekilwe mwa musiyo waka. Ha ni lukeli kueza cwalo. Zani ki lika za lifasi. Ni kenise, Mulena!”

115 Mi Mulena ali, “Ku lukile, Ni ka eza cwalo.” U lamba Mali a Jesu Kreste ni ku mu kenisa.

116 Cwale, ha sa eza cwalo, busihu bobuñwi wa fita mi u utwa nto yeñwi. U zwela kwateni ku yo teezeza. U utwa ka za kolobezo ya Moya o Kenile, kutazwa kwa Moya. Kipeto wa kecula kwateni, “Oh, mawi, ha ki sesinde sani! Kono, uli, sani sa kona kusinya bulumiwa bwaka ha ne Ni ka kutaza cwalo. Sani si kona kueza kuli boma ba ni leleke mwa lapa. Ba ka ni leleka mwa keleke ya hesu haina Ne ni ka kena ku ze cwalo. Oh, mbwasha Ni zwe fela ku zona lika ze. Kono pili ni talimele hande ku zona. Eeni, yeo kona Niti, ki Bibe.”

117 Kihande, inge mukutazi yomuñwi wa zibahala hahulu, ya zibahala lifasi loote, yana fumanwi cwanoñu nyana fa (ka muuna yanali ni na kwa Puerto Rico) inza kubami ka mañwele, ubulela ka malimi, mwa London, England; muuna ya mata luli, alimuñwi wa babuleli babatuna hahulu mwa lifasi kacenu. Mi muuna yo, muzwale wa hae nali ni na kwanu, ki muuna ya tezi Moya, na matela ku yena mi nali, “Oh, muzwale, kona cwalo.”

118 Ki hali, “Na ziba cwalo. Na ziba cwalo. Kono, talima, alubone ni ku bulelela nto yeñwi.”

119 Ki hali, “Kutaza cwale. Li kutaze. Ye kona hola. Ka susumezo ya hao, wa kona ku nyunga lifasi.”

120 Ki hali, “Batili, Hani koni ku kutaza. Mwabona, ke—ke keleke ika ni lelekisa. Ha ni koni ku kutaza cwalo. Ha ni koni kueza cwalo.” Oh, Muzwale!

121 “Mube ni- . . . ya sa kenisizwe mi u a muhezi zibo ya kuziba Niti, mutalime ku Zona, ubona kuli Ki nto yelukile; ni ku ikela kusili, ka kubona kuli u i kokotelela ili yena Mwana Mulimu, ni ku Mu swabisa ku babañata, ku swabela Evangeli.”

122 Paulusi naize, “Ha ni swabeli Evangeli ya Jesu Kreste, kakuli ki Mata a Mulimu aisa kwa puluso.” Ki Mata a Mulimu abeleka mwahala Keleke ya Hae.

123 Kono bona ba bulela kuli, “Ha ni koni kueza cwalo.” Muuna yo ali, “Ne ba ka ni talima kuli ni wa pentekota. Ba ka ni eza kuba . . .” Ki hali, “Li—li libubo la ka li ka sinyeha.” Oh, muzwale!

124 Na hanina libubo ni le li kana. Ni sweli kunahana ka za Hae. Libubo la Hae, yena ki Yena.

125 Kono mwabona bukaufi mo a kona kutahela ku Lona, mwa ziba, “Ni kotalima Mali a bulikani a na mu kenisize, nto yene mu kenisize kuzwa ku za lifasi, ni kulika ku mu beya mwahali Mo. Mi kipeto wa I talima fahalimu, mane una ni zibo ya Yona. Kuli a zwe ku Yona, ha ku sa na sitabelo sa sibi,” ki mo ibulelezi Bibe, “kono ku siyalezi kotalimana ni buhali bwa katulo ni mulilo o ciseleza, o ka, sinye sila. ‘Kakuli ku kutiseza ki kwa ka,’ kubulela Mulena. Ya na nyefula mulao wa Mushe, na shwa kusina ku utwelwa butuku, fapila lipaki zepeli kamba zetaalu. Kana ki koto yekuma kai, mi ili koto ye bukiti luli, ni ha iswanela, ku mutu ya hatikezi Mali a Jesu Kreste ka mahutu a hae, kasumulaho wa kuamuhela zibo ya kuziba Niti, mi a I talume kuli ki nto ye masila.” Whew!

126 Mwabona fo muinzi kana? Jesu naize, “Mu tokomele.” Mwa bona Judasi mwa na bezi? Na li ya sepahala ni bona. Na li yena Esau, u ezizwe yomutuna mwa lusika loo. Na li mupumi, mulikanyisi, ya ezizwe yomutuna kwa lusika loo. Ki yo ataha, hape, ali muzwale wa Jesu, muzwale ya icanganisa. Kono mwa pilu ya hae, nali ni keleke ya hae ya nama ka nako kaufela, kakuli kwani kona kwa na lekisize Jesu. A lekisa Jesu, tukelo ya buhulu bwa hae, kuswana fela ni Esau mwa na ezelize bakeñisa mupika wa mulo. A lekisa buhulu bwa hae ka lishekele za mashumi amalalu za silivera.

127 Buñata bwa baana ni basali kacenu ba lekisize buhulu bwa kupepwa kwa bona bwa moya kwa libubo leliñwi, sika sesiñwi sa lifasi se mupalelwa ku koma; basali nyana, ba sanana, baba lata kuipeya mipende ni kukuta milili, kutina litino zekuswani; baana, ka lisheha nyana la masila ni kuzuba makwai, nto ya lifasi fela. “Haiba u lata lifasi kamba lika za lifasi, lilato la Mulimu mane haliyo ku wena,” ku bulela Bibe.

128 Ha ni lati ku miutwisa bumaswe, kono lu ya lusutelela kwa mafefezezo. Lu taha lupahama cwale, lu sweli kupahama manela kapili cwale.

129 Mwabona lika mo liinezi? Ba li eza. Ba ketilwe kale ba lukisizwe. Bakona kulikanyisa ni kuba fela babande ni baba ikokobelize, kuba bukaufi luli, sina Bakreste, bukaufi hahulu kuli mane li ka puma ni bona Baketwa; kono ka miselo ya bona mu ka ba ziba.

130 Musali ya tina tuputula, ya cwalo ha bonahalangi sina Mukreste, ku na. Bibebe ibulezi kuli, “Ki sibi mi ki maswabisa kuli musali akute milili ya hae.” Konji musali alimuñwi fela mwa Bibebe ya kile aipeta kwa sifateho, yani neli Jezabele.

131 Kucwani he ka baana, mina baana baba lukela kuba baana ba Makreste, kono mutuhelela basali ba mina kueza cwalo? Mane, Mulimu uka mi atulela zona! Hakuna muuna! Wa nama! “Oh, Ni ka zwela kwande ni yo ikopanya kwa keleke ye.” [Hakuna manzwi fa tepu—Mu.] “. . . mu nahane ka zona.” Ona cwalo kona mwa bulelezi Mañolo kuli ba ka eza, mi zeo kona luli ze ba ezize. Mi ona zeo kona ze ba ka eza, kukeshabisa!

132 Yomuñwi akile abulela kuli, “Billy, haiba ha u tuheli zeo, uka matisa batu kaufela.”

133 Kuna ni Nto iliñwi ye si ke kuya, ki Moya o Kenile, kakuli Ki Linzwi la Hae. Mi mulumeli wa niti ya lemuhile kale haana kuya, kakuli Ki Sico sa moyo wa hae. Wa Li lata. Hakuna ze kona ku mu inisa kwahule ni Lona. Uka eza sika sifi kaufela, inge Jakobu, kono yena ubata ona buhulu bwani. Uka yema fani. Hanina taba haiba li ka eza kuli balikani ba mu siye kaufela bona, haiba musebezi wa hae ufela, haiba li ka mu zwisa mwa keleke ya habo, haiba li ka mu tiseleza lika kaufela. Niteñi u ka kumalela ku lona, kakuli hakuna mukwa usili hape wa ziba. Kuna ni sesiñwi ku yena, se si mu zamaisa, buliba bubizana ni Buliba. Oh, ki fo he cwale, ki sesiñwi ku yena!

134 Amutalime, sika kaufela se mubata kufumana mwa Bibebe, ni ku si nanula fa, mukutele kwa Genese mubone kone si ndondokezi, mubone ko si tile. Mioya kaufela ni mizamao kacenu mukutele kwa Genese. Zeo kona ze lu ezize, ku mi bonisa lika ze musweli kubona zee, balikani. Musike mwa libala zeo. Usike wa li tuhela kuli likufite fa toho. Ha li nwele ku wena. Zeo kona lika za Mulimu. Lifitile kwa toho ya zona; mi Jesu na bulezi kuli li ka ta kwa litho za zona hape mwa mazazi a mafelelezo, mi likaba ka se: ka Liswayo la Mulimu, ni nombolo ya sibatana; mata amabeli a moya a beleka hamoho.

135 Cwale, mañi ni mañi u ziba kuli Liswayo la Mulimu kona tukelo ya buhulu, ili kolobezo ya Moya o Kenile. Maefese 4:30, ili, “Musike mwa filikanya Moya o Kenile wa Mulimu, ili ka ona mu swailwe kuisa kwa lizazi la kuliululwa kwa mina.” Ha ba pepwa sinca, ne ba talizwe ka Moya o Kenile. Moya o Kenile kona Kupepwa ko kunca, lwa ziba cwalo. U—u pepilwe ka Moya, Ni ka lumela cwalo. Kono konji kufitela u pepwa!

136 Kuna ni mbututu ya kena mwa mba ya mahe, uba ni mufuta ulimumu wa bupilo. Bwani ki bupilo, mi ki bo bunyinyani. . . mata a manyinyani a mubili wa hae asweli kupikuluha ni ku lahaka ni kunjunjula *cwalo*. Kono ha sa pepwa fela, kipeto uba ni. . . [Muzwale Branham ukambela mazoho a hae hañwi,

ulikanyisa lubaka—Mu.] sina cwalo, mi kipeto wa kalumuka kulila, uba moyo o pila.

<sup>137</sup> Mi mbututu wakona kuya kwa keleke ni kubulela kuli, “Oh, Na lumela mwa keleke. Na, Ni kaya, Ni ka eza sa *kuli*. Mi Ni yomunde. . . Ni bata kueza ze lukile, Ni bata kueza kueza ka kuluka.” Kono sa tokwa ki lubaka lwa Evangeli kuli a nyangumuke, kuli a kalumuke a lilele Bupilo Bobusafeli; mi kipeto Moya o Kenile wa huwa ku yena, mukwa wa Si ka kalumuka fateni. Kona kuli ki sibupiwa sesinca, u pepilwe ka Moya. Mi ukala kuhula, kuzamaya, mi uba ni sibupeho sa hae ku Mulimu; mwabona, kuba fela sina mbututu, mbututu wa nama, una ni butu bwa hae mwa lifasi.

<sup>138</sup> Mi cwale haiba tabernakele ya lifasi ye isinyeha, luna ni yeñwi ye libelezi, mwabona. Kuswana fela sina mubili wa nama mo ni itahela cwalo, kuna ni mubili wa moyo a libelezi ku u amuhela u sa zwa fela ku maa ona. Mi ha zwa ku mahe, mwa lifasi, ili kutalisa kuli, u mwa mba ya hae cwale, inza tonga, ni kulila, (O Mulimu!), kutonga, kuikataza, kuya a supala, ni kukula, ni lika zeñwi kaufela inge li tisa mabote, mi moyo o li mwahali a hae ubata naha ye mwabuse bwa nuka. Ki ku tonga, kulahaka, kutulaka, (eeni, sha) kakui kuna ni bupilo mwateni bo bu pila kuyakuile. Bu mwa mubili o na ni kushwa. Mi linako zeñwi, kuswana fela sina me a pepa mbututu wa nama, kipeto mubili wa moyo wa mu amuhela; lifasi li ka wa, ni mubili wa nama uka wa, ni mubili wa nama. . . kamba mubili wa bungeloi uka yo uswala kwabuse kwani. Haiba tabernakele ya lifasi ye isinyeha, luna ni ye libelezi. Leo kona libaka ha mu libala lika za lifasi. Li shwile, ku mina. Wani kona Moya.

Cwale mutalime halunze lu ya kwapili cwale, ona mioya yemibeli.

<sup>139</sup> Moya o Kenile kona Kupepwa sinca, lwa ziba cwalo. Ki kupepwa sinca, kwa Moya wa Mulimu. Kona mo mu pepezwi, ka Moya. Kupepwa ka Moya, koo kona Kupepwa sinca. Ku lukile. Mu pepilwe ka Moya; mi ha u pepwa ka Moya, u tazwa ka Moya o Kenile. Ku lukile.

<sup>140</sup> Mi cwale bababeli bao habali mwa lifasi, wa nama ni wa moyo, fokuñwi ki. . . Ni bon into yeo. Cwale ka kukwala, Ni bata kutaha kwa kukwala cwale, ka kubulela cwana mwa mizuzu yelikani. Ku za nama kamba ku za moyo, yeñwi ya zeo. . . Cwale Ni sepa kuli mañi ni mañi a li tokomele. Cwale amu kuze fela ka mo mukona kubela.

<sup>141</sup> Cwale, kana mukile mwabona fateni zeo? Mwa bona mwa likeleke za luna kacenu, nihaiba mwa likwata ko lu kauhani mwahala luna ni kueza likopano kopano; mi luboni zeo kaufela. Mi mubona mutu ya nopa Liñolo leliñwi cwalo, mi, muzwale, muuna yani wakona kunga Liñolo ni ku lieza kuba lelinca, ku li eza kuba lelipila sina se ne li sepisize kuba sona mwa Bibe mo.

Mi mutu yatatama umubona inza eza cwalo, mi kipeto ni yena utaha ku to likanyisa, mi wa palelwa. Ni sepa mwa bala cwale. Uka palelwa. Kiñi? Fohe kipeto Liñolo ha li si ka susumezwa ku yena. Ulika fela ku likanyisa. Ulika kueza sina nto isili. Na si ka . . . Kihande, mwendi u lumilwe ki mutu. Mwendi muuna yomuñwi ubulezi kuli, “Kihande, wa kona kueza nto yeswana.” Mwabona, sina fela Jesu mwa na bulelezi kuli kona mo ku ka bela ka nzila ye. Bibeke ya li bulele kuba cwalo mwa mazazi a mafelelezo, “Sina Janise ni Jambresi mo ne ba lwaniseza Mushe.”

<sup>142</sup> Fani ne ku yemi Mushe, mi fani ne ku yemi Jambresi. Mi Mushe ayumbela mulamu wa hae, mi wa ba noha. “Kiñi,” Faro ali, “taha kwanu, Jambresi, wa kona kueza nto yeswana.” Mi a eza, mwabona. Kono ki sikamañi sene siezahalile? Mi mulamu wa Mushe wa miza mulamu wa hae. Mwabona, ne li bonahalizwe. Mulamu wa hae noli kai?

<sup>143</sup> Kuswana fela inge mubonelo wa minahano. Kuswana fela sina zeñwi za lika za moya ze. Kuswana sina likeleke zeñwi ze lumela lika za nama zee, ka kushutana luli. Lika za . . . Ba li, “Kiñi, zeo neli za lizazi lisili.” Kaufela zona ki za kale. Kono a mutalimele moya wo mwa mazazi a mafelelezo ha u likanyisa Moya wa niti. Mwabona? Foo kona fo kutaha butata bwa mina. Kuswana fela mane inge nto ya niti, mwabona; kono na palelwa ku li bonahalisa, na palelwa ku li tiisa, na palelwa kuli inisa nako yetelele. O Mulimu!

<sup>144</sup> Batu ba taha mi bali, “Nina ni Moya o Kenile, nina.” Mutalime mo ba pilela; ha ki kuzwa kwa ancafazo ye kuya kuyeñwi, kuzwa mwa mukopano ulimumu kuya ku omuñni. Li bonahalile, habana Ona. Muuna ha pepwa ka Moya wa Mulimu, kamba musali, una bi muselo wa Moya. Uka zamaya ka bumulimu. Uka pila ona bupilo boo. Mwabona? Uka inela kwahule ni lika za lifasi. Mulimu uka kena ku mutu ni ku itibahaza Iliyena, ni kubonisa kuli Ki Mulimu ya beleka foo. Yomuñwi ye usweli fela kulikanyisa. Mwabona?

<sup>145</sup> Malikanyiso, kona zebile teni fela kuzwelela kafoo, ki malikanyiso. Amutalimele Ishimaele, ni Isaka; ni kushetumuka cwalo, mwabona, ki malikanyiso. Mutalimele mupolofita Mushe, mi mutalimele mupolofita Balaami. Mwabona? Mu bone mo ne ba tahela! Mutalimele Judasi, mi mutalimele ni Jesu.

<sup>146</sup> Mi Jesu ubulele kuli Moya o Kenile wo, mwa mazazi a mafelelezo, ukaba Liswayo la Mulimu. Cwale, nombolo ya sibatana ikaba sikamañi? Ikaba kuhana Lizwayo la Mulimu. Kakuli, kaufela bene ba si na Liswayo la Mulimu nebana ni nombolo ya sibatana. Mi haiba ki linombolo zepeli za moya, silisiñwi sa zona ikaba liswayo la niti la Mulimu, sesiñwi ikaba sa buikankabeki. Mwa si bona nji?

147 Amutalime fa liswayo mwa Testamente ya Kale. Tolombita ha ne iliziwa, ya tukuluho, lilimo zeñata ñata cwalo, ba—ba batanga ne ba zwa ba lukuluhile kakuli tolombita ililile. Kihande, kaufela ya na bata ku lukuluha, na zwa a lukuluhile. Kono babañwi ba bona, ne ba lata kuba batanga, kona kuli ne baba isa kwa katala ni kwa musumo wa keleke, ni ku ba punya kwa mazebe ni mapo. Mi ba swaiwa cwalo kuyakuile, ne ba sebeleza mulena bona yani.

148 Mi kacenu mu ka utwa liñusa la Evangeli ka za Niti, “Cwale wakona ku lukuluha haiba ulata cwalo,” Mulimu ubulela ku wena. Kono cwale ha utaha fa museto wani ni ku talimela kwabuse, ni kuba ni zibo ya Niti, mi kipeto ka boomu wa ikela kusili, uka ku punya kwa zebe mi kamita ukana uba mulumeli wa minahano ya nama. Ukaba wa bulapeli ya yanga fela kwa keleke, kono wali kuba u amuhele Moya o Kenile. Mwabona, kona kuli usebeleza zeo mwa mazazi a hao kaufela. Cwale, nombolo ya sibatana, kamba Liswayo la Mulimu. Mi lusweli ku sutelela bukaufi hahulu.

149 Cwale, mutalime, Linzwi li na ni ku susumezwa; ku Li utwa, ku Li lemuha, ni kuba ni kezo ka Lona. Batu babañata ba ka utwa, kono habana ku Li lemuha.

Mulimu uka li, “Ye ki hola ya hao.”

150 “Hanikoni kuba mupikuluhi ya kenile. Hani—Hani lati zeñwi za Teni.” Mwabona, ha ba Li lemuhi.

151 Lu ka ya kwa mikopano, Moya o Kenile o mutuna uka tuluka fafasi. Ne ni inzi fani zazi leliñwi, fani pono ha itaha handende ni kubulela ka swanelo. Se nili, “Ku taha mutangana.” “Taha kwanu,” na kobeta muweta yani, “u na ni butata bwa pilu mi ubata bata. . .”

“Eehe. Yeo luli ki niti.”

152 “Wabona musali ya taha faale yani?” “Taha kwanu. Una ni sitombo fa lizwele, mi si inezi kwa lizwele la kwa nzohoto, mi u mwa butata luli. Mi u muezalibi mane hauna. . .”

“Ki niti luli.”

153 Baana baba inzi fale bani, atalima faka ni kafa, bakutazi ni babañwi, ali, “uh-huh!” Kuya kwa mukopano, kutalima Moya o Kenile ha u taha mwa mukopano ni kubulela likunutu za lipilu, lika ze cwalo. Kuli, “Kihande. Na sepa. Eehe.” Mwabona? Oh, muzwale! Mwabona? Ki—ki—ki kwa neku leliñwi, kuna ni se si ezahalile. Basali ba ka zwelapili kuezza zeo, kuezza lika ze swana. Baana ba ka zwelapili kukuta kwa mulaho, inge kulube kwa sileze sa yona ni nja kwa mataza a yona, ka kuswana fela. Kana ha muboni nji? Cwale Ni bulea kwa nyan-. . . kwa. . .

154 Mwabona, mu lukela kulemuha cwale, mulikani, buino bo muli ku bona. Ki kabakaleo tepu ye, Ni ize, “Kiya keleke feela.” Mwabona? “Kiya keleke feela.” Haiba mu bizizwe kuzwa kwa

liseli . . . kuzwa kwa lififi kutaha mwa Liseli, kuzwa mwa lifu kukena mwa Bupilo; kuzwa ku za nama, minahano ya butu fela ka za Kreste, kutaha kwa kutwisiso ya kupepwa sinca; mi utokomela bupilo bwa hao, kuli bu beya lika za lifasi kwatuko, mi uyemela Kreste, hakuna taba kamba ki likamañi; konakuli kuna ni se si ezahalile. Mwabona? Kuna ni sesiñwi ku wena, se si tisa tala ni ku ku zamaisa, sina mo ne kuinezi ku Jakobo. Mwabona, u lwana ni Mulena, uka zamaya ka kushutana kuzwa foo. Kuna ni se si shutani ku wena, u cincize.

155 Cwale, si cincize, si si ka ezahala kale, sina ni ku susumezwa ku wena. Hanina taba, Hani koni kuyema fa ni ku kutaza konji pili Ni be ni sona . . . milili ye Ni nani ha se ikumuhile kwateni, mane maheta aka a obame mi Ni be wa lilimo ze nanite za kupepwa, mi u mu teelelize zazi ni zazi; kufitela Mulimu mi tiseza zona kwa bupilo, u sa li mwa sibupeho se si swana.

156 Mazazi amabeli Ni bile ni balisisa ni kulapelela ona taba yee. Mwabona? Se nili, “Mulena, Na lukela kubulela se kwa keleke nji?”

157 Sesiñwi sali, “Si bulele. Hola ifa kaufi. Si bulele.” Ni ikutwa kuli Uka ni isa kusili cwanoñu nyana fa, konakuli Ni—Ni bata kuli mu zibe.

158 “Hakuna mutu yakona kutaha ku Na,” Jesu a bulela, “konji Ndate A mu bize pili. Oh, Ni ziba mubulela kuli muna ni Mulimu ni Abrahama, kuli ki ndatamina; kono Ni mi bulelela kuli, mu ba . . . ndata mina diabulosi,” kubulela Jesu. Baana ba bulapeli, baprisita, ni baana abatuna, “Mu ba diabulosi, ki yena ndata mina.” Mwabona? Mulemuhe, miselo ya Moya.

159 Cwale, mwabona, lina ni kutiswa kwa bupilo ku mina.

160 Ne ni sa nahani kuli Nuwe na ka li, “Wa ziba kana? Ku bonahala fela kuli zakona ku katalisa nyana, kacwalo Ni ka icahela fela areka. Haiba i nela, kihande, Ni ka kena mwa areka ni kuzamaya kapili. Mi hakuna se si ka ni kataza, kakuli Ni ka kena mwa areka ni kuikela.” Munahane fela zeo? Batili. Batili. Zeo ne si zona. Haiba zeo zeli zona . . . Oh, mi Baketwa ha ba li utwe cwale. Haiba nji zeo ki zona, musomi wa pili a fita, sina Biblele mo ibulelezi kuli kona mo ne kuinezi, ba mu soma, na ka lula sando ya hae fafasi ni kuikela.

161 Sina baana mo ba ezeza kacenu, zeo li kala ka Jesu; mi ha ba bona Niti, ba zwa ku Lona. Haba koni ku Li yemela.

162 Sina mubuleli yani ya cuukile mwa na bulelezi, “Lika—li ka luba luba bulumiwa bwaka.” Hanina taba ka bulumiwa boo Moya o Kenile uka luba luba. Bu lukela ku luba lubiwa. Cwale, kono, mwabona, ki muikumumuso, mutu hahulu, mutu ka buñata. Oh, mulemuhe mwa lika ze cwale.

163 Nuwe nali kwande mwa simu, mi a utwa, mane a lemuha, mi ki ha ba ni za kuezwa. Hakuna taba kamba basomi bataha ba babakai, ayaha kapili.

“Nuwe, wena u mupikuluhu ya kenile.”

164 “Musike mwa ni kataza ni hanyinyani.” Inza yaha fela ki kwa sa isi mane! Na sa utwile. Na lemuhile kuli ki sa Mulimu, a li atula ka Mañolo, mi kwa ba cwalo. Atundanisa fela kuyaha areka, kube cwani ni cwani.

165 Mwa kona ku nahana, mwakona ku nahana cwalo, Mushe yani, mwa musipili wa hae kuliba kwa Egepita, zwela kwande zazi leliñwi mi ali ku Zipporah, musala hae, “Zipporah, wa ziba kana? Ni kabisize hande sikuwa saka. Nina ni lipalo zaka likumbahalile hande, ni lipalo za kukopana ni kutusa kaufela, oh, lika zeñata zeñwi, ni za tuto yaka. Kuzwa ha Ni kala kulisa lingu zaka kulo kwanu, Ni—Ni—Ni ya pasize hande ku zeñwi zeo. Ni ezize mafosisa kwani kwa Egepita. Ni sepa kuli Ni ka shetumuka ni yo lukisa lika. Ni sepa kuya kwani?” Batili, lindinda la pili la mutahela, na ka wela ona fani.

166 Ki sikamañi sa na ezize? A libala kaufela za na ziba ka za lipalo za pulasi ni mainasi ni ngana ya butu kaufela. Neli zona ze ne mu beile mwa butata.

167 Zeo kona ze kenyize keleke mwa butata kacenu, ki bakutazi babañata baba itutile ba si ka pepwa ka Moya. Baana ni basali ba tabela kutelezanga kwa makande a ngana ya mwa toho fela, mwa sibaka sa ku kutaza mata ni zuho Jesu Kreste. Zeo kona ze lu kenyize mwa butata kacenu. Ha lu sa tokwa likolo zepahami ni kuli bakutazi ba luna baye kwa likolo. Lu tokwa baana baba bizizwe ki Mulimu mi baba tezi Moya o Kenile, mi isiñi lituto za ikupelezi fela mutu mwa kopano yeñwi. Lu tokwa baana baba bizizwe ki Mulimu.

168 Mushe nasweli kulisa lingu, aina mi a itibala. A ziba kuli ngana ya hae ne ifelile. A ziba kuli tuto ya hae ne i mu pumile. Na sweli fela kulisa lingu, kono a utwa kuli, oh, “Tubula likatulo za hao, Mushe, mubu fo uyemi ki sibaka se si kenile.” A li teezeza. Ne li sikamañi seo? Linzwi lene li bulezwi ki Lingeloi neli la Mañolo. Na sepisize Abrahamama, ndata he kuli, “Ni ka potela sicaba kasamulaho wa kuba kwanu ka lilimo ze mianda yemine, mi Ni ka ba lamulela ka lizoho le li mata.” A lemuha kuli yani neli Mulimu yana zibahaza Mañolo hande ku yena.

169 Halu boneni ni yeme fa muzuzu nyana. Se ha si nwele pili. Kana mwa bona se Ni bulela kacenu? Linzwi la Mulimu lisweli kuiponahaza hande fapila mina, mi ha mu li lemuhi. Munahane cwale ka za Sodoma ni Gomora; munahano ka za sepiso ya Kreste mwa mazazi a maungulo.

170 Mushe na li lemuhile; ne li za Mañolo, neli sepiso. A li utwa, a li lemuha. Sesiñwi sa mu tahela, muzwale, na konile ku yo si eza. Anga kezo. Na ile kwateni ku yo kuzisa Faro kaufela. Na kona



ku biza likoto ka nako kaufela ya na bata kueza cwalo. Na konile ku kwalula Liwate Lelifubelu, kakuli na utwile, na lemuhile, na sweli kueza sesiñwi mwa sibaka sa Mulimu.

“Ni kaba Mulimu ku wena, wena u be mupolofita ku Na,”

Ki hali. Mi ki hali, “Hanikoni kueza cwalo.”

<sup>171</sup> Ki hali, “Kihande, he, wena u be mulimu, mi Aruni abe mupolofita wa hao. U lukela kuya, nihakuli cwalo.”

<sup>172</sup> Na si ka bulela fela kuli, “Kihande, mwendi Ni lukela ku ya ni yo lukisa lika.”

<sup>173</sup> Mu nahane fela Elia fa Lilundu la Karme, ali, “Mwa ziba, naha ye ina ni sibi hahulu, mwendi, hakulata Ni lukela kuzwela kwateni ni bulelela Akabe kuli aikutwe maswabi. Mwendi Ni lukela ku kambama lilundu ni yo ina fafasi, mi ka pili fela ona cwalo, kufitela batu bani ba nyikwa ni ku katala ku ni bona fahalimu fani ni tala kuisa lifu?” Batili. Batili. Ne si cwalo.

<sup>174</sup> Kono na utwile, mi a lemuha, mi a nga kezo ka zona. “Ni se ni laezi mañwalala kuli a ku utele kwateni. Zaamy kwani, kwa Keriti.”

<sup>175</sup> Ha ne se ili nako ya kangisano mwahala Baale ni Mulimu, ki hali, “Amuye, munge litabelo za mina, mueze kaufela mo mu batela, mi mubize ku mulimu wa mina.” Hane ba ipazaula, mi nebali ba bakima luli, ba tulaka mwahalimu ni fafasi, ne ba taza lilata hahulu, ki hali, “Amu huwe ka butuna nyana, mwendi u ile musipili, kuna ni za i lo bata. Hakulata u lobezi.” Oh, muzwale!

<sup>176</sup> “Kihande, mwa ziba kana?” Mi ali, “Ni mulumeli ku Jehova, kona kuli Na kona kueza se, nihakuli cwalo.” Oh, batili, musike mwa likanyisa zeo. Batili. Usike wa lika kuba Elia konji haiba ki Mulimu ya ku biza kuba cwalo. Eeni, sha. “Ni mutanga wa Jehova.” Kuna ni baba mianda ye supile kwande kwani, hape, kono hakuna ni yomukana yana itakaleza kueza cwalo.

<sup>177</sup> Mi cwale ha sa bulaile komu ni kuisela mezi, ki hali, “Mulena, Ni ezize se ka taelo ya Hao.” Mubone. . . Mutu ufi kaufela na ka lika, neikaba kupalelwa ko ku felelela.

<sup>178</sup> Lina ni ku susumezwa ku mina! Moya o Kenile una ni ku litisa kuli li bonahaliswe ku mina.

<sup>179</sup> Boo kona butata kacenu. Ha ukoni kuyema, fa katala, ni kubulela kuli, “Kihande, Haleluya, Haleluya. Mulena, Ni bata Moya o Kenile. Haleluya, Haleluya.” Batili.

<sup>180</sup> Kono, muzwale, kezeli, mi cwale Moya o Kenile ha u se u susumelize Linzwi leo ku wena, uka u amuhela u si ka nanuha kale mwa sipula sa hao. Sesiñwi ku wena sa tuka. Mukutazi haana ku ku bulelela kuli eza se ni kuli eza *sani*. Matali akale akawa kwateni, mi matali amanca aka taha kwateni. Ki ku susumezwa ku wena. Hauna ku nyemela mukutazi ha kutaza Niti

yezwa mwa Bibebe. U ka U lata, ufitele ku Ona. Ki Sico kwa moyo wa hao.

<sup>181</sup> Nihaiba Jesu, yena Kasibili, U ize, “Ha ni ezi se Ni bata kueza, kana ninosi Kasibili. Mwana hakuna sa kona kuikezeza sika kono konji sa eza Ndate.” Manzwi ao... Na li Yena Emanuele, yena Kasibili. Nali Mulimu mwa lifasi; Jesu nali cwalo. Nali yena mubili mwa na pila Mulimu. Na li tende yana pila ku yona Mulimu. Amen. Kono mwa lika zeo kaufela, Mwana Mulimu ya pepilwe ki mwalyanjo, Emanuele mwa mutalelela wa Moya, Yena nana ni Moya o sa komi kupimiwa. Mi, hape, mwa mubili wa Hae Tota, Mi ali, “Hakuna ze ni eza konji pili Ndate a Ni bonise zona.” Zana Mu susumeza, kuli alieze!

<sup>182</sup> Satani ali, “Fetula macwe a kuba sinkwa, mi ueze makazo makazo. Halu bone ni Ku bone ha u li eza.”

<sup>183</sup> Ki hali, “Ku ñozwi, ‘Mutu haana kupila ka buhobe feela.’” Oh, mawi! Kono cwale sicaba ha ne si lapile, A nanula ma mbisikiti a ketalizoho ni litapi zepeli, mi a fepa batu baba likiti ze ketalizoho. Oh, Haleluya! Mwa bona ze Ni talusa?

<sup>184</sup> Musike mwa lika ku likanyisa. Boo kona butata bobuli kwa Mapentekota kacenu. Boo kona butata bo buli ni keleke kacenu, kuna ni ba bañata hahulu baba lika kulikanyisa kuli bana ni Moya o Kenile. Kuna ni babañata baba likanyisa foliso ya Bumulimu. Kuna ni babañata baba likanyisa lika zeñata zeshutana za Mulena. Hamukoni kueza cwalo. Lika zeo litahanga ka kuketwa, Mulimu ki yena ya biza, mu zwile mwa mba ya bomaa mina ka zeo. “Limpo ni lipizo ha li tahi ka kubaka.” Oh, mawi! Yeo ki niti. Wa kona kuikeza ili wena sina so si sona.

<sup>185</sup> Kono haiba Mulimu a ku biza, ube mutu ya itumezi hahulu mwa lifasi kakuli U ku bizize. Kipeto li ba za niti ku wena.

<sup>186</sup> Sina hane Ni ka bulela, kambe Ni na ni nako, ka za tumale zazi leliñwi, ne li ni sikuluzi. Na li kuba ni li bone fateni, mi ne Ni sike naeza cwalo. Hattie, na inzi kwani kwa mulaho iza ni talimezi. Zeo likona kuezahala cwani? Ne li si ke za ezahala, kono ne li susumelizwe, kufiwa mata. Linzwi ne li bulezwi mi la tiswa ona cwalo. Haleluya!

<sup>187</sup> Paulusi, kana mwakona kubona ha bulela kuli, “Ni bile kwande mwa liwate le ka mazazi a lishumi ni amane ni masihu, mi kusina linalelo kusina kweli, kamba lizazi hakuna. Ni sepa kuli Ni ka yo ba bulelela, ‘Mube ni pilu tata, kakuli Mulimu uka lu babalela, nihakuli cwalo’”? Oh, Mulimu ba sebezi cwalo. Mulimu ha ezi cwalo.

<sup>188</sup> Tumelo ya hao i lukile, muzwale. Tumelo ya hao ki yende. Kono konji sika sakata si susumezwe ku wena!

<sup>189</sup> Oh, ki le liseli le lifubelu le li lepelela foo, mi haiba Ni bona... Ni li, “Kihande, Ni hatile lihutu fa giya ya kumatisa.

Nina ni mota. Na kona kufita mwa liseli lani kwabuse kwani, kumata ka limaili ze mashumi amabeli ka hola.” Yeo ki niti. “Na utwa mata mwatasi a lihutu la ka.” Kono kihande u libelele kufitela sisupo sakuli “zamaya”. Haleluya!

<sup>190</sup> Kana mwa utwa ze Ni talusa? [Kopano Yaalaba, “Amen.”—Mu.] Ha ku bulelwa kuli “zamaya” sisupo ha si taha, ku lukile. Haiba sika si susumezwa ku wena, mi ni Mulimu wa li zibahalisa sina mwa Na ezelize kwani, ku lukile. Kono konji Ha li eza, luna ni sikwata sa bo Judasi ba malikanyiso, baba zamaelela hamoho cwalo, bali, “Kihande, Ni ya swana fela sina bona. Ni Mukrste, nina.”

<sup>191</sup> Oh, ha mu hupuli nji? Bana ba Sceva—Sceva, bazwela kwande mi mi ba li, “Lwa ku lauela, lu ku laela ka Libizo la Jesu yo Paulusi a akutaza. Zwa kuyena!”

Mi ali, “Paulusi Na mu ziba, ni Jesu Na mu ziba, kono ki mona bomañi?”

<sup>192</sup> Hola ya taha fo bunde ni bumaswe ha bu ka iponahaza. Za iponahaza mwa Bakreste kacenu. Za bonahala mwa likeleke kacenu. Za bonahala mwa sicaba kacenu. Na mi liyehisa; Ni bata kuli se si kene ku mina.

<sup>193</sup> Paulusi na si ka bulela kuli, “Ni lumela Ni kaya fela ni bulele kuli, ‘Kihande, mu be babana ni pilu tata.’” Batili.

<sup>194</sup> Ki sikamañi sa na ezize? A utwa Lingeloi. Na ziba kuli lani ne li Lingeloi le li swana lene li ambola ku yena. Na lemuhile, mi aba ni kezo ka zona. Ayo bulela kuli, “Mube ni pilu tata. Kakuli Lingelo la Mulena, Leo Ni li mutanga wa lona, ne li yemi bukaufi nina maabani busihu, ku ni bonisa pono ya kuli hakuna ze ka sinyeha, mwa sisepe. Mube ni pilu tata. Amu yo icela mulalelo wa mina cwale. Lika kaufela liiketile.” Amen. Ha li susumelizwe ku mina, kifoo Mulimu ha lukisa lika!

<sup>195</sup> Nina ni litaba zeñwi kulo faa, Ne ni li ñozi. Ki ze kulo fa. Uh-huh. Lu kwa mafelelezo a lika kaufela. Haluboneñi ni tise mwateni sika se ona cwana, ka kukwala. Ni sepa kuli Mulimu u mi patululezi sika. Mutalime. Lika kaufela li kwa maungulo. Yomuñwi na buzize busihu bobuñwi, Ni sepa kuli neli Muzwale Fred Sothmann, ne lu sweli kubuzana bukaufi bwa nako ya mafelelezo mo bu sutelezi.

<sup>196</sup> Muzwale Demos Shakarian na boni pono yani ha iiponahaza hande, ni ku to ezahala mazazi aketalizoho kasamulaho, ka kupetahala, ne li mu komokisize maswe. Ki ha ni lizeza. Mi ali, “Joseph u cwani?”

Se nili, “U iketile.”

Ali, “Kana wa bonanga lipono?”

<sup>197</sup> Se nili, “Ee. A ni bulelela ka za David, mwana Muzwale Wood wa mushimani, ha na wile fa mututu, mazazi amabeli kamba amalalu li si ka ezahala kale, ona cwalo fela.”

Mi ali, “Mwa ziba, lika zeo li latelelanga mabasi.”

<sup>198</sup> Se nili, “Kuluka kamba bumaswe, za latelela, ufi kamba ufi. Li latelelanga mabasi.”

<sup>199</sup> Mi nelu sweli kuambola hanyinyani ka zona, mi bona, Fred ali ku na, “Zeo li zwa kai, Muzwale Branham?”

<sup>200</sup> Se nili, “Talima, Fred, ha lu inge ka zebupilwe. Mulimu ubeleka mwahala pupo ya Hae. Talima, talima se si ezahalile. Lizazi li pazulelanga kwa Upa. Yani kona zwelopili ya kale ya luna, ki China.” Kaufela luna lwa ziba cwalo.

<sup>201</sup> Zwelopili ya kale hahulu yelunani ki China. Ku lukile. Mi zwelopili izamaile ka kuya kwa wiko hamoho. Mi cwale ne mu ka zwelela kai ha mu zwa kwa Likamba la Wiko, hamuya mwabuse? Muya kwa China. Luli. Lu kwa mafelelezo. Bibeke ibulezi kuli, mupolofita naize, “Kukaba lizazi ha ku si ke kuba busihu kamba musihali, lizazi ha li likela, kono mwa nako ya manzibwana,” li si ka fela kale kwanu, “hape ku kaba ni Liseli, ka kuswana.” Jesu naize, “Ku kaba pula ya masehulo ni pula ya mwa mulaho. Mi pula ya mwa mulaho ika tisa bubeli bwa pula ya masehulo ni pula ya mwa mulaho, mwa mwaha o swana.” Lu kwa nako ya maungulo.

<sup>202</sup> Amutalime faa, halubone ni mi bonise. Lipolitiki li kwa maungulo. Kana mwa lumela cwalo? [Kopano ili, “Amen.”—Mu.] Amu ni bonise nto yeñwi kacenu. . .

Naha ye kona ye sinyehezi mukwazo mwa lifasi, kwa busholi, kutokwa bumulimu. Ki mañi ya balile mutende wa ba Courier Journal wa maloba busihu, mwa Louisville, foo basali ba kaufela, ka kunopa naha ifi ni ifi, naha ni naha, musali yomunde kufitisa mwa naha, ni ku ba yemisa kuli babe Boma Lifasi loote kwa bunde? Yeñwi ni yeñwi ne iezize kwanda Russia. Mi ba luma ku Khrushchev ba mu buza, “Wen abo kiñi?” Mi ali, “Russia ha itubulangi bahame ba yona mapunu, kuli ba zamaye fapila baana.” Ki muhedeni yoo, naha ye sina Bumulimu iswabisa ku luna baba ipiza Bakreste, ali, “Russia ha itulangi bahame ba yona, kuli ba zamaye ona cwalo. Mi hamuna kubona maswaniso kamba ze cwalo mwa Russia.” Bao ki baba sina bumulimu. Ni luna baba ipiza “Bakreste”!

<sup>203</sup> Ki kabakaleo Bibeke ibulezi kuli, “Tafule kaufela itezi fela mataza. Mi ki mañi ye Ni ka luta Butali, mi ki bafi baba kwiswa kwa mazwele? Kono mulao ulukela kuba fahalimwa mulao, ni mubamba fahalimwa mubamba. Kakuli Ni ka bulela ka milomo ya sikukuma ni malimi asili kwa sicaba se. Mi yeo kona Pumulo. Kakuli ze kaufela, habana ku li utwa.” Luna ni mubonelo wa munahano wa luna. Oh, mo ne ku kabela hande kuinelela ku Yona.

<sup>204</sup> Litaba za naha, lisinyehile! Ba milao, Ba tukuluho, ni babañwi kaufela, ba mwatasi hahulu. Ki sikamañi seo? Ki sishañata sa kucomeka feela. Mutu kaufela ya beleka ku zona,

ya si ka pepwa sinca, ki wa diabolsoi. Diabolosi naize, “Mubuso kaufela mwa lifasi ki waka,” mi Jesu na si ka mu kananisa. Lifasi li zamaiswa ki diabolosi. Mi mutu kaufela ya sebeza mwa muuso, haiba ha ki Mukreste, ki wa diabolosi mi usebeleza diabolosi. Linaha ze kaufela li ka kubamela Jesu Kreste Ha taha, kukaba ni Mileniamu.

<sup>205</sup> Mutalime fa kacenu, ze sweli kuezahala cwale. Ba sweli ku ni huweleza ka za kuitusisa masheleñi kwabuse kwa Bakreste, mi ba bata ku ni tama lilimo ze mashumi amabeli mwa tolongo, ka kuitusisa masheleñi ku sebeza muzamao wa bulapeli. Mi kanti zekola ni macwala ni makwai afeza mashumi shumi a ma milioni a ma dollar mwa silimo, kwa kusinya naha. Kanti na ni lika ku kutaza kuluka, ni yemi mwa munyako wa Jesu Kreste, mi babata ku ni latela mwa tolongo ka zona. Mi ba lumeleza lika zecwalo za bumaswe, ze mwatasi hahulu, za kuituta, za ngana, inge ba li lumeleza kunga sibanga mwa litukiso za fa mazimumwangala, ba luma basali kwa linja. Iliñwi ya likuto zetuna hahulu naha ye ikile yaba ni zona, mi ba li tuhelela fela ona cwalo. Ba ni lumele kwa tolongo bakeñisa ku kutaza Evangelil, ni isa fela tu ma dollar totulikani kuyo—kuyo kutaza Evangeli, ona to ba ni fanga sicaba kuli ni kutaze Evangeli ka tona. Ha ni mufumi mi Ha nikoni kubulela cwalo. Kono niteni babata ku ni latela mwa tolongo, ba ni buluka lilimo zepeli, mi kuna ni muzeko o taha cwanoñu. Oh, ha ki kutiba mwa sileze ni koo, ha ki masila ni ao! Mulimu, abe ni makeke.

<sup>206</sup> Ni ka bulela nto iliñwi ye, mwendi kona mwa ezezanga Mulimu A si ka luma kale ndalamiti ya atomic. Una ni kueza nto ye fosahalile, mwa ziba. Una ni kuswala mutoziwa wa Hae nako yeñwi, kakuli Liñolo le li swanala lee, ku ka suhana . . . “Si swali Muketwa wa Ka.” Yeo ki niti. Kona kuli haiba lina ni kunga zeo kutisa katulo, sina mo ne li ezelize mwa mazazi a Daniele kamba kwa sibaka kusili, ha li tahe. Ni mutanga Hao, Mulena. Yeo ki niti. Oh, eeni.

<sup>207</sup> Litaba za naha, ze mwatasi hahulu! Naha, isinyehile! Kihande, mutalime lika! Ba ka tinisa masole mwa tuputula cwale. Oh, mawi! Litaba za naha, ndwa! Litaba za naha li kwa maungulo. Bahapezezi ba milao ba fosahalile. Litaba za naha li fosahalile. Kiñi ha ba si ka pila ni mulena yasaba Mulimu sina Mulimu mwa na ba fezi, Davida? Mulena yomutuna wa England naize, hane ku—hane ku ezizwe milao ya tukuluho ye, naize, “Li lukile cwale, kono ku ka taha nako,” ki hali, “haina kuba nto yeñwi. Ikaba fela lisepe ze sina mayendameno.” Mi ubulela niti. Haize, “Ba litaba za naha ba yemi fa tupongisi twa mulola kwa maneku kaufela, lika za bukuluka kaufela ze silafaza muuso.” Mi muuna wateni na bulela niti. Kona ze sweli kuezahala luli.

<sup>208</sup> Muuna yomuñwi wa kona kuzwela kwande, ni kufita ku zeo mane a kolwe, ni kupazaula kaufela za bata; ni kuya kwatasi kafo, u ziba mutu kaufela, kona kuli hakuna ze bulezwi.

Mutuhele mubotana, kamba ya sa zibi, alike ku li eza, ba ka mu latela mwa tolongo. Bulyangelino, ku nyazahala, masila, fote pesenti ya bona ki baana ba kalombe. Munahane ka zona, Sodoma ni Gomora hape! Ki seo sikwata, se si lukela kuba sa bulapeli.

<sup>209</sup> Ha—Ha ni zibi se si ka ezahala kuzwa faa, ha ku ka taha Mueteleli wan aha yomuñwi? Mulimu u lu file muuna wa bumulimu alimuñwi, muuna muhulu Dwight Eisenhower. Mi cwale Ni ka- . . .Mutalime nto yetatama yetaha mwateni. Mi hakulata lwakona kuba ni peba nako yetatama, luli ki kwa konahala. Kono ku ka taha, “Faro ya sa zibi Josefa.” Muhupule zeo. Ni ka fita ku zeo mwa muzuzu nyana fela. Litaba za naha li sinyehile bulyangelino. Lwa ziba cwalo.

<sup>210</sup> Ndwa i kwa maungulo a yona. Oh, ne ba pobaulana macwe nako yeñwi, ku inataka mwa litoho ni macwe ni licapu, mi ba kunupana buta ni masho. Mi ba ba ni litobolo, kuzwa foo litobolo za mishini, kutuha foo ze eite-eiti mwa Germany, ni litobolo zetuna hahulu ku luna. Mi ba nepakelana malumo a litobolo ni musili wo kola wa kupompa. Kono bana ni ndalamiti ya haidrojini cwale. Ndwa i kwa mafelelezo. Naha kaufela se i nani zona, cwale mu ka eza sikamañi cwale? Neba naha ye nyinyani kacenu, ki kuhoha fela munwana, kona fela ze bana ni kueza, mi kipeto ya yunda. Ndwa i kwa maungulo. Huh! Amen. Ndwa i kwa maungulo. Litaba za naha li kwa mafelelezo.

<sup>211</sup> Tuto i kwa maungulo. Mutakafululele wa banana u kwa maungulo. Banana, hakusana sepo kwa banana, se ba lyangani. Ha mu sa kona kuba ni tuto. Ha mu sa kona kuya kwa sikolo ni, munge mwana ya itutile. Ki ya—ki ya swana lihele habeli ha yo zwa kwa sikolo kufita nako ya na keni. Maloti ba sa bulela fela sika ka zona, u ka bulaila. Ba ka ipangela Kakutwana mi ba yo bulaya muluti yani, ha mu nge ni ku mu simeha. Lu tobezwi ki baluti baba likana likiti zepeli. Oh, libelela fa muzuzu, Ni sepa kuli ne li baluti baba kuma fa likiti ze mashumi amabeli, mwaha o felile woo. Ha ni ba nyazi. Ha ni tabeli kueza cwalo, niteñi. Cwale bana ni lisupo ka nako kaufela, “Ba fa lituto za likoleji kwa banana bao.” Ba li tokwa, kono diabulosi uba sweli. Diabulosi u ba sweli. Mi mane ha ki swanelo fela kuzwela kwande baba sina taba mi—mi—mi banga sikwalo ku si tamelela kwa kota mwa busihu bwa mukiti wa makishi a Halloween, kamba kueza lika zesina makeke sina banana mo ne ba ezezanga, kamba kunga sikocikala sa mulimi ni ku si beya mwa nzila, isiñi cwalo; kono ba lyangani. Baeza lika ze lyangani; ba mi kunupa, ba mi bulaya, ba mi pobaula, ba mi beela lifanu, sika kaufela. Lo kona lusika lo lutatama.

<sup>212</sup> Kupepa bana sekuli kwa mafelelezo, busali sakata, bushemi sakata. Kiñi, kuyemisa lupepo se ku ezahala kai ni kai, mi linjanana kona ze ngile sibaka.

213 Buiswalo, hakusana buiswalo ku zona ni hanyinyani. Basali, ba apala ka bumaswe; ze taha fa mazimumwangala, mifuta kaufela ya kulikanyisa batu baba maswe ba Hollywood, mikwa yateni kaufela, mitinelo. Kaufela li kwa mafelelezo!

214 Tuto i kwa maungulo. Litaba za naha kwa maungulo. Ndwa i kwa maungulo. Zwelopili ikwa maungulo. Lika zeo kaufela li kwa maungulo. Mawi, ki sikamañi se lukona kueza cwale? Ki likamañi zetatama? Lu kwa maungulo a lika kaufela.

215 Cwale bupilo bwa keleke bu kwa maungulo, keleke ye zibahala hande, kakuba keleke. Cwale, se sakona ku lamatela fa nako nyana, kono keleke ya nama, keleke ya Esau, itile kwa mafelelezo a yona. Ieza sikamañi? Ifelela mwa katengo ka swalisano ya likeleke, kaka ka ikopanya mwa Buroma, ku lwanisa Bukatolika . . . kamba Bukatolika bulwanise za swalisano. Pope John ubiza likeleke kaufela kukuta, mi li ka kuta. Mi li ka ikopanya ili zona hamoho, ona cwalo fela KISONA SA BULELA MULENA.

216 Mu li, “Libelela fa muzuzu, Muzwale Branham. U zwa mwa nzila cwale foo.” Haiba Ni zwile mwa nzila, kona kuli Mulimu u ñozi Bibebe ya Hae ka mafosisa. U lukela kuba Mikaya, fa taba ye.

217 Morris Cerullo na ni bulelezi busihu bobuñwi, kuli, “Ukai antikreste, Muzwale Branham? Majuda ki bona bo antikreste.”

Se nili, “Morris! Ni wena, yali Mujuda?”

Mi ali, “Ki bona babatoile hahulu Mulimu ku babaliteni.”

218 Se nili, “Morris, usike! Ni bulelela mwa Mañolo antikreste ha zwelela mwa Jerusalem. Antikreste uzwelela kwa Rome, isiñi kuzwa kwa Palestine.”

Mi ali, “Kihande, talima, Ni . . . Bao batoile Mulimu.”

219 “Eeni, hanili Mulimu naize Na ba fofalaze kuli lukone kuba ni lizazi la kubona? Kono lizazi la luna li kafela cwanoñu.”

220 Mi ali, “Oh, Muzwale Branham, Nali kuba ni nahane ka zeo.” Mwabona, ki fo he cwale.

221 Mwabona, lu kwa maungulo. Lifasi la nama, keleke ya nama ikwa, maungulo a yona. Mutalime mo itahela kwa swalisano ya likeleke. Ba United Brethren baile ni bona. Ba Pentekota bateni mwahala bona. Babañwi baba siyezi kaufela basweli kuikopanya hamoho. Mutalime kwani, Makanana bani, mane ku yo punya ni kwa mioya ya Esau yani, ki ba bulapeli maswe, mane ba ikopanya hamoho ni lifasi; basina kutwisiso ya moya, ba sa koni ku koma, ba si ka ketwa ki Mulimu, kuli ba bizwe ni ku kauhana.

222 Oh, kambe Ne ni ka li zibahalisa fela, hane Ni ka li kasheza fela ka mukwa omuñwi! Ha ba li boni. Bana ni meeto kono ha ba boni, lizebe kono ha ba utwi. Oh, kiñi haluli litimbi hahulu

cwalo mwa Moya? Cwale, hamuteeleze ku se. Lika kaufela li kwa maungulo.

223 Mi Keleke ya moya i kwa maungulo a Yona. I taha kwa mafelelezo. O Mulimu! Mutalime kwa mulaho koo ha Ne ikala ni Luther, ya nyunga, za moya. Mi kwa taha Wesley, kutaha ku za kukeniswa. Mi kwa taha Pentekota, ili Moya o Kenile. Mi cwale kwa mafelelezo a nako, ki Moya wa Krete hahulu mwa Keleke, U sweli kueza misebezi yeswana sina ya Na ezize, kukutela kwa Toho ya Yona hape; ze itukiselize kuli Keleke ni Krete ba kopane, ni Kutaha kwa Mulena Jesu, ni zuho ya bafu. Lu kwa mafelelezo a nako. Jesu na bulezi kuli, “Mo ne kuinezi mwa mazazi a Sodoma, kona mo ku ka bela fa kutaha kwa Mwana mutu.” Kana mwa utwisisa?

224 Amutalime fa keleke ya nama. Mutalime fo se ba zamaela, sebali kwahule hule kusili.

225 Amutalime Keleke yetezi Moya, isweli kuzwa kwa lika zesina tuso za Yona, ihulela mwa Moya, (mwa bunyinyani bwa yona, ona cwalo kono), itaha mwa Moya, kono itaha ipahama kufitela I fita fa sibaka foo Moya o Kenile uzamaya mwahala Yona, inze ikasha mwa nzila ya Yona, iitukiselize kuamuhela Mulena yona, iitukiselize ku amuhela Mulena yona.

226 Mi babañwi babasiyezi ba ikonga konga, ba kutela mwa lifasi, ba ikabile kwateni, bakutela mwa bulikani, bakutela hape mwa tamahano yetuna yani mwatasi Bukatolika. “Mi ba ezeza sibatana siswaniso.” *Siswaniso*, “sika se si swana ni sona.” Swalisano ya likeleke ye ezizwe ni Bukatolika, zepeli zeo hamoho, libeleka hamoho. “Kimañi yakona kulwana ni sibatana kamba ni siswaniso sa sona?” Luli hakuna. Mo lukona kufitela ku zona ka liholo hola!

227 Cwale haluboneñi ni bulele se ku mina, mi kipeto ikaba nako ya kukwala. Ki kuli Na . . . Ni mi bulelezi kuli ikaba yetelele. Ni—Ni ikutwa fela kutamiwa. Mane Mulimu hana bulelezi lika zee, naize, “Ba bulelela. U li bulele. Usike wa kuza ni hanyinyani. Ba bonise Zona. Ha ba sa Li amuheli, kipeto mali hayo mwa mazoho a hao.” Hola i fitile. Seli nako, kaufela za fela.

228 Lifasi li kwa mafelelezo a lona. Hanisa kona kuyema ni hanyinyani. Lindwa li kwa mafelelezo a zona. Hamukoni kuba ni lindwa hape. Haiba muna ni lindwa, halina kuba; alimumu asa hoha fela munwana, kipeto. Litaba za naha, li bolile mane lisinyehile.

229 Keleke ya lifasi seli Methodist, Baptist, Presbyterian, Mapentekota. “Ki likulube kwa sileze sa zona, linja kwa mataza a zona.” Yeo ki niti, yeñwi ni yeñwi ya zona! Mulimu wa biza, kuzwa mwa kubola kwani, kutaha Keleke ye ketilwe. Yeo ki cona luli. Esau, ne baize, “Ki luna keleke!” Ha ni kakanyi seo. Jakobo wani ndatahe Esau, ni yena, yeo ki niti, konakuli, kono—kono . . . Ni talusa, Isaka neli ndatahe Esau, mi Jakobo neli munyana hae,



ku yena. Kono alimumu nana ni kabelo kwa tukelo ya buhulu; yomuñwi na sa butoile. Alimumu na utwile, a lemuha, mi aeza. Yomuñwi ali, “Oh, ibile fela Na yanga kwa keleke ni kueza ze lukile, ki shutano mañi yeliteni ku sona?” Ki fo he cwale. Cwale mwa . . .

<sup>230</sup> Ni bulela cwana cwale, ka kukwala, pulelo iliñwi fela yee. Keleke ya niti ina ni zeñata zakupilela cwale. Oh, ilukela kuba nako ya nyakalalo hahulu kwa Keleke ya niti, kwa Keleke ya niti, kwa Keleke ye ketilwe, ha u ziba mwa pilu ya hao kuli uzwile mwa lifu ukeni mwa Bupilo; ha u italima ni kubona, kotalima bupilo bwa hao ni kubona kuli lika za lifasi kaufela lifelile, kuli so bile sibupiwa se sinca. Muteeleze cwale, ka kukwala, ka tokomelo. U ziba kuli u shimbulukile, bupilo bwa hao bwa paka cwalo, “Ka miselo ya bona mu ka ba ziba.” Tato ya hao kaufela ki Kreste. U Mu libelezi kutaha ka muzuzu kaufela. U zamaya mwa Moya. Wa Mu lata. Wa Mu bona ha beleka ku wena. Hakuna so lakaza kueza, kono Yena wa li eza fela, yena Kasibili. Oh, ki nako yecwani!

<sup>231</sup> Li ni hupulisa muswanisi yana ile kwa Rome, ku yo ituta kuswanisa, neli fela mucaha yomunyinyani. Ne ba mu lemuhile. Na li ya shutana hahulu kwa bashimani ba ma American kaufela ni basizana, ni bene baile kaufela kuli babe ba swanisi, ni babañwi ba lifasi kaufela. Mutanga alimuñwi yo na shutana. Neli mushimani yomunde, mi ba lemuha. Ne bana ni mikiti yemituna, mi bafita kwani mi, mo ba ezezanga kwa Rome, ki kukolwa fela mo ba konela kubela.

<sup>232</sup> Ni kile naya kwateni, na luli, mi ni ba boni. Kuya kwande mwa mikwakwa, baana ni basali, inge ba tundana. Neba mwa bucwani, baba ni kukopana kwa foso mwabucwani, fo ku bonahala fela ngandaleza, haba isezi ngana kwateni; England, ni yona, babañwi baba siyezi kaufela. Mwabona? Zeo ha li shutani ni kwanu. Ki nto yeswana fela ni kwanu, ki ze maswe za swana; fela, li patile nyana fela kwanu, bakeñisa kusaba mapokola ni zeñwi. Cwale, kono li maswe luli!

<sup>233</sup> Kihande, mutcangana yo, na ipulukile ku zona kaufela. Ha ba ya kwa mikiti ya bona, na ba tuhela fela baikela, kono nasweli kuituta kuba muswanisi. Kacwalo, zazi leliñwi mubabaleli wa sibaka ya suepzi, yanali Mukreste na liteni mwa—mwa ndu ya bo sibuhabuhi, libulukelo la maswaniso, kacwalo ali—ki hali, “Ha lu zamaye hanyinyani, mwanake. Ha lu zamaye zamaye nyana, Ni bata kuambola ni wena fa nako nyana.”

Ki hali, “Ku lukile.”

<sup>234</sup> Kacwalo ba ya, ba zamaya kupahama lilundu, mi sibeli sa bona inge ba beile mazoho kwa mulaho, ba kambama lilundu. Lizazi ne li sweli kulikela. Mi kacwalo muuna muhulu ali muswanisi wa mwanana, ki hali, “Mwana, u mu American.”

Ki hali, “Eeni.”

235 Mi ali, “U tile kwanu ku to amuhela tuto ya buswanisi. Ni sepa kuli u bata kuipangela seo kuba musebezi wa buswanisi.”

Ki hali, “Ni lela kuezwa cwalo, sha.”

Ali, “Ni lemuha kuli u Mukreste.”

Mi ali, “Ni Mukreste.”

236 Ki hali, “Kihande, kuna ni nto iliñwi ye Ni bata ku kubuza. Ni ibuzize babañwi baa. Ba bulela kuli ki Bakreste, nibona.” Mi ali, “Ki sikamañi se si ku shutanisa? Ki sikamañi se si ku shutanisa kwa bashimani babañwi baba zwa kwa America baa, ni basizana baba zwa kwa America? Ki sikamañi se si ku shutanisa hahulu cwalo, mbo kaufela mubulela kuli mu ‘Bakreste’?”

Mi ali, “Muñaka, mwa bona lizazi le li likela lani?”

Mi ali, “Na li bona.”

237 Mi ali, “Mwabuse bwa liwate, mwa muleneñi omuñwi mwa New England, mwa tolopo yeñwi ya muleneñi wani, mi mwa ndu yeñwi ya muleneñi wani, kuna ni musizana yomuñwi kuna ni musizana yene Ni sepize kuli Ni ka pila ka kusepahala ku yena.” Mi ali, “Kona fela ze li mwa munahano waka, ku to ituta za bukwala bwa baswanisi ni kukuta ku musizana yani yasweli kupila ka kusepahala ku na.” Ki hali, “Kona ha Ni pila mo Ni pilela.”

238 Oh, muzwale, kezeli, mwakona ku komoka kuli kiñi ha lu sa isezi ngana mo ba lu bizeza. Hanina taba ka ze ba bulela.

239 Ne ni yemi ni Fred zazi leliñwi, kwani kwa San Juan, Puerto Rico, ne lusweli kutalimela mwabuse bwa liwate, mi lwa lemuha kuli, neli sitindi fela, licika la maili, mandinda amatuna inge a sweli kunanuha. Mi ali . . . Linyunywani za bo Flamingo inge lisweli kuzamaya mwa simu, ni zeñwi cwalo. Se nili . . . Mi ali, “Muzwale Branham, se siswana sina Lihalimu.”

240 Se nili, “Kono liwate li ka kuza kwani, muzwale.” Se nili, “Mwabuse fela bwa liwate, kuna ni sibaka sesiñwi se si bizwa Lihalimu, kuna ni Alimuñwi ya bizwa Jesu, mwa Lihalimu leo, lona lizazi lililiñwi lani Na lwezi libi za ka kaufela. Mi Ni Mu sepisize kuli Ni ka pila ka kusepahala ku Yena, Ni ka eza lika Za bata kuli ni eze. Kona libaka ha Ni sa swabeli Evangeli ya Hae, Ki Mata a Mulimu aisa kwa puluso.” Seo kona se si eza Mukreste kupila ka kushutana. Wa shutana kakuli una ni Sesiñwi sa pilela.

Ha lu inamiseni litoho za luna fa nako nyana.

241 Mulikana ka ya totobezi mwa moya, kakusasana cwana, kana una ni nto yeshutana yo sweli kupilela, nto yekona kukutisa mwa lifasi, nto yeñwi yetalusa hahulu ku wena kufita lifasi kaufela, ki kupilela Krete? Haiba hauna zeo, kiñi ha u sa Li amuheli cwale. U si ke wa yanga kwa keleke fela ni kubulela

kuli, “Ni bata kuba mutu yomunde.” Usike wa eza cwalo. U tabele kuba Mukreste. Wena, haiba kuna ni sesili mwa pilu ya hao kamita, se si ku bulelela kuli, “Ha u si ka luka, kono Ni bata kuli ube ya lukile.” U bile utabela kuba nto isili yo si yona cwale, ha u zibi kuli Mulimu wa ku bina naa? U si ke wa i fulalela. “Kakuli haiba nako yeñwi ukile wa bonisezwa ni kuba ni kolo, ni ku hana nako ya hao ya mafelelezo, ha ku sana sitabelo sa libi za hao.” U si ke wa swana Esau.

<sup>242</sup> Utahe ni Jakobo, hakuna taba kamba. . . kamba u ka kena mwa butata bo bucwani. Haiba li beya lapa la hao mwa butata, haiba li beya musebezi wa hao mwa butata, haiba li beya muuna hao mwa butata, li ka kenya musala hao mwa butata, haiba li ka tiseza bana ba hao butata, haiba si tisa butata kaufela, amuha buhulu! Seo kona sa butokwa. Mi haiba u ikutwa cwalo ka zona, kakusasana cwana, mi u tabela kuba ni buhulu bo! Ha ni koni ku ku fa Bona. Ki Mulimu yakona, mi Ki Yena yasweli kubulela ni wena. U nanule fela lizoho la hao, ubulele kuli, “Ni lapelele kwateni, Muzwale Branham. Buhulu bwani, Na bu bata.” Mulimu ami fuyole, kai ni kai. “Boo kona buhulu, bo Ni bata.”

<sup>243</sup> Ndata luna ya kwa Lihalimu, Na itumela ku Wena, Mulimu ya Ishuwile hahulu mi ya Kenile, kwa bunde bwa Hao kaufela ni sishemo kwa bana ba bashimani ni basizana ba batu. Mi lu lemuha kuli lu kwa kufela kwa nako, hakuna zekona kufitelela foo. Fa lupila fela mwa nako ya ku kalima; sina mo ne kuinezi mwa mazazi a Nuwe, pilutelele ya Mulimu, hane ku sa yahiwa areka, ha ku piliswa fela mioyo ye ketalizoho ka ye milalu. U ize, “Kona mo ku ka bela ha taha Mwana mutu. Pilutelele ya Mulimu, ha tabeli kuli ni yomukana a shwe, kono ki kuli kaufela ba tahe kwa kubaka.”

<sup>244</sup> Mi kacenu mwa muyaho moo, kuna ni baana ni basali ba nanuzi mazoho a bona, bashimani ni basizana, banana ni babahulu, ba nanuzi mazoho a bona, mi bali, “Kuna ni Sesiñwi se si ni hoha.” O Mulimu, ha si ke ba Li hana. Ha ba lekise tuto ya bona, ha ba lekise lika kaufela ze ba luwile. Sina muuna yana fumani licwe la butokwa; ne li la butokwa, licwe le lituna, neli licweli lelinde lelituna hahulu, mi a lekisa amanyinyani kaufela a hae, kuli aleke licwe la butokwa le, licwe lelituna. Ha ba lekise lika kaufela ze ba luwile za lifasi, kakusasana cwana, kububana kwa bona kaufela kwa lifasi.

<sup>245</sup> Basali ba bainzi mo, Mulena, buñata bwa bona baba utwile Evangeli ha ikutazwa linako zeñata, mi ba sa capwaela hape mwa lifasi, ni mitinelo kaufela ya lifasi, ni kuya kwa mikiti ni lika zeñwi za lifasi, kuikabela kwa lika za lifasi ni kueza lika za lifasi, ni kuitusisa lika za lifasi. O Mulimu, ha ba ikutwe maswabi, kakusasana cwana. Haiba kuna ni sepo yeñwi kaufela, Mulena, ba sikuluhe kacenu. Ye haibe yona hola.

246 Mi baana ba fa, Mulena, O Mulimu, u ba utwele makeke. Buñata bwa bona ba sa zamaya mwa lika za lifasi, ba sa lakaza ni kuikola lika za lifasi, sibi, kuzuba, kunwa, tucwala to tu katulusa, tucwala nyana katuko, kamba—kamba nto yennwi ye cwalo, kamba ba sa lakaza, ni kuicakelela masala, basali ba mitinelo ya masila. Mi mibili yani ye ba sweli kutalima mwa mikwakwa, mane ba bata kumatela batu kuli ba ba talime, ba ipiza kuli ki Bakreste.

Mi ba ziba kuli mufuta wa mubili wa musali wani, mwendi mwahala lihola ze mashumi amabeli ni zene, uka bola mwatasi a libita, likokwani ni mabuku inge linyafuta mwa sibupeho ni libyana za mubili wa hae; mi moyho wa hae mwatasi u mwa lihele la diabulosi, ka mwa na pilela. Mi, kanti, uka minyukisa tulomo twa hae, totunyinyani to tu pentilwe, ni ku picuka ni ku ku seha.

247 Mulimu, u ba utwele makeke batu baa. O Mulena, usike wa tuhela kuli ba latehe. Shangwe ube ni makeke mi ulume sishemo. U fe mañi ni mañi wa bona, Mulena. Ki wena Unosi fela yakona kufa mbuyoti yee. Mi haiba U ba bizelize kwa Bupilo Bobusafeli, lipilu za bona ha li kwaluhe; mi ba beye lika kaufela kwatuko kakusasana cwana, mi baka li amuhela. Lumeleza cwalo, Ndate.

248 Mi cwale Moya o Kenile ha utahе mwa mukopano woo, kwa bakuli ni ba ba zielehile, mi sicaba si bone kuli Liñusa leli kutalizwe le kakusasana cwana, kuli Kutaha ni lika zeñwi kaufela li kwa maungulo, mi neba Jesu u beleka mwa Keleke ya Hae. Ha li ezahale ona fa cwake, Mulena, kuli U nge sicaba se mwa mazoho a Hao. Mi ha ba bona Moya o Kenile u nzo beleka, ha u zamaya mwahala sicaba, ha ku pakiwe, Liñusa le Ni kutalize, kuli lu kwa nako ya maungulo. Mi ha ba utwe. Ba utwile, mi ha ba lemuhe kuli yena Jesu yaswana yani, ka Mwa na li ezelize mwa lizazi la Hae, U teni mo usweli kulieza mwa Keleke ya Hae mwa lizazi la mafelelezo. Mi ha ba be ki kezo ka lona, ka kufa bupilo bwa bona ni mibili, ni mioyo ni mioya, ku Yena. Ni bafa ku Wena, Mulena, ka Libizo la Jesu.

249 Cwale, mwa muyaho mo kuna ni sicaba, Ne ni lumile Billy kakusasana kacenu kuli afe makadi a litapelo. U . . . [Hakuna manzwi fa tepu—Mu.]

250 Kana wa kula, u tokwile? Haiba Mulimu uka patulula ku na, sina mwa Na ezelize ku musali fa siliba, mi ani bulelela butata bwa hao, kamba sesiñwi ka wena, kuli mu ziba kuli ha Ni zibi, kana li ka kufa kuba ni tumelo Mulimu? Kana si ka eza mina kaufela kuba ni tumelo? Kana kwa kona ku kopana kwa luna kwa makalelo? [Kezeli uli, “Batili”—Mu.] Oh, u ni boni kale fateni, kono Ni muenyi ku wena. Kana ku cwalo? Ku lukile, mi cwale Mulena Mulimu akufe kupo ya hao.

251 Cwale, kana ki niti, kamba nee? Oh, mawi! Amubize bulapeli bwa mina bwa ku inahanela. “Baalimu,” naize, “ukai kana?” Elia fa Lilundu la Karmele, ali, “Ukai Baalimu? Ukai? Ha mu mu

zuee.” Hamu lukeli kuzusa Jesu. Yena u tonelezi nako kaufela. Yena uteni kamita, kamita wa pila, kamita wa kona; ki ya swana maabani, kacenu, ni kuyakuile. Amen. Mulimu usiyala ali Mulimu.

<sup>252</sup> U lumela kuli butata bwa hao bwa pilu buka kusiya mi ukaba hande? Ha uzwi kwanu. U kute kwa Lexington mi u bulelela sicaba lika zetuna za ezize Mulena ku wena. Mwabona?

<sup>253</sup> Li sita sicaba fa litoho, zeo habakoni kuli utwa. Keleke yepila kona ye kona kulemuha zeo, kapili, ni kuziba kuli Pata ya Moya o Kenile iteni fa.

<sup>254</sup> Kuna ni ya nanuzi lizoho la hae kwa mulaho kwanu. Kana ki wena, kalibe? Wa lumela kuli Mulimu wa kona ku ni bulelela butata bwa hao? Mucembele . . .

<sup>255</sup> Muzwale kwa mafelelezo koo, Na lumela uize, fa nako nyana, cwalo. Wa lumela, muzwale? [Muzwale u li, “Eeni.”—Mu.] Wa lumela? Kona kuli butata bwa mbangashwa bu ka kusiya, ukaba fela hande. Kana wa lumela cwalo? Wa si lumela ka kufola? Nanula lizoho la hao, wa lumela. Mwabona? Uh-huh. Ku lukile. Ki muenyi ku na. wa ziba cwalo, Pat.

<sup>256</sup> Kalibe ya talimela kafoo, ya lapela, yana sweli kuni talimela, ubulezi kuli ki muenyi. Wa lumela butuku bwa mali bu ka ku siya? Yeo ki niti, nji cwani? Nanula lizoho la hao haiba ki niti. Ku lukile, ube ni tumelo ku Mulimu.

Mwa bona se Ni talusa?

<sup>257</sup> Ku cwani ku mina sicaba sesiñwi baba ni ziba? Muna ni sesiñwi mwa lipilu za mina. Munanule mazoho a mina. Buñata bwa mina! Hani koni ku eza cwalo; Lina ni kutaha fela. Mwa ziba, ki tumelo ya mina.

<sup>258</sup> Georgie Bruce, Ni muboni inge ainzi fale. U lika katata kufumanela mutu sika, Georgie. No folisizwe, kwa kansa. Hakuna puzo mwa munahano wa hao. Zazi lo no tile kwa tabernakele ye ni kuzwela fande ka munyako wani, Moya o Kenile wa taha ku na, mi a ku bulelela likezo zeñwi ona busihu bwani zana sa zibi mutu ufi kaufela mwa lifasi kono konji wena fela ni Mulimu ni mutu usili. Kana ku cwalo? [Kopano ili, “Amen.”—Mu.] Yeo ki niti. Wa ni lumelela, nji cwani, Georgie? Una ni sika mwa pilu ya hao, Georgie. Wa lumela kuli Mulimu wakona ku ni bulelela butata bwa pilu ya hao kana?

Kana seo si ka eza mina kaufela babañwi, sicaba baba ni ziba, kulumela? [Kopano ili, “Amen.”—Mu.]

<sup>259</sup> Na mu ziba Georgie, kono usweli kunahana nto isili. Una ni batu bababeli, babali kwahule hule, basweli ku lapelela. Sibeli sa bona ba pila mwa Corydon. Yeo ki niti. Mi una ni mutu yomuñwi mo, muuna ya sweli kulapelela, yali mwa sipatela kulo kwani. Mi usweli kulapela, ha ki za foliso ya hae, kono ki puluso

ya moyo wa hae. Seo KISONA SA BULELA MULENA. Yeo ki niti. Yeo ki niti, Georgie? Yeo luli ki niti.

<sup>260</sup> Kuna ni ya nanuzi lizoho la hae kwa mulaho kafoo, kwa mulaho kafoo, kwa mulaho kwanu. Wena, kucwani ka wena? Aku nanule lizoho la hao, u muenyi ku na nji? Muuna yo yainzi fa usweli ku ni talimela, Ha ni kub zibi. Kana wa ni lumela kuba mupolofita wa Mulimu, mutanga a Mulimu? Wa lumela mwa Moya o Kenile, se Ni bulezi kuli ki Niti? Wa lumela cwalo? [Muzwale uli, “Eeni.”—Mu.] Haiba wa lumela, uka ba- . . . kona nto inosi fela yo nani, kakuli u katazwa ki kansa. Yeo ki niti. Ha u zwi mwa muleneñi wo. U zwelela kwa New Albany. Yeo ki niti. Mi una ni kansa. Haiba u ka lumela ka pilu ya hao kaufela, uka fola. Kana u ka si amuhela? Nanula lizoho la hao. Kufuyolwe Mulena.

<sup>261</sup> Na lumela, musali yani kafoo yana ni kuwani yebonahala busweu kwa toho, kalibe yomunsu, ya nanuzi lizoho la hae. Ha ni si kaba kale ni mutu yomunsu. Wa lumela, kalibe? Ku lukile, sha, u lumele ka pilu ya hao kaufela. Una ni butata bwa pilu, butata bwa mwa mba, matata. Kuna ni ya ku tisize kwanu kakusasana cwana. KISONA SA BULELA MULENA. Yeo ki niti, nji cwani, kalibe? Haiba yeo ki niti, zukuza kataulo kao mwa lizoho la hao, kuli batu ba bone. Ha ni si ka mubona kale musali yo mwa bupilo bwaka.

<sup>262</sup> Kikuli unanuzi lizoho la hao? Kana Ni muenyi ku wena nji? Mi wena u muenyi ku na. U lumela kuli Mulimu wa ni ziba, kamba Mulimu wa ku ziba? U lumela kuli Wa kona ku ni bulelela ze li mwa pilu ya hao? U lapelela mutu yomuñwi. Ki bo ndataho, bana ni butata bwa pilu. Yeo ki niti. Mi usweli kubata kolobezo ya Moya o Kenile. KISONA SA BULELA MULENA.

Haiba wakona kulumela!

<sup>263</sup> Kucwani ku kalibe yomunyinyani ya nanuzi lizoho sina *cwana*, wa lumela? Butata bwa hao kona kututuluka fa lizoho la hao leo. Kono usweli ku lapelela muikulyowe. Yeo ki niti. Mwana ha i kutwi hande. Yeo ki niti. Nji cwani, kalibe? U lumele ka pilu ya hao kaufela, ku zona.

Ha Ni bulezi kuli, “mwana.” Libelela fa muzuzu. Oh, kifo he cwale. Mwana hao nana ni kozi ya fa mukwakwa; ki sihole. Ha ni kuzibi, kalibe, kono yeo ki niti. Haiba yeo ki niti, nanula lizoho la hao.

<sup>264</sup> Cwale, Kimañi yali mo? Kimañi yena Yo? Ha ki na. Na ni kona kueza cwani zeo? Usike waba ni sinonyi sa Moya, lika za Moya. Ki Mulimu yaliteni fa! Moya o Kenile o bata wani, wa U lumela cwale? Wa U lumela cwale? Ku lukile, kona kuli U amuhele cwale. Cwale ye kona nako ya ku U amuhela. U lumele ka pilu ya hao kaufela.

<sup>265</sup> Mina baba kula kamba baba tokwile. Hani koni ku mi folisa. Hakuna mutu yakona ku folisa. Hani koni ku fa Moya o Kenile.

Kono Ya kona fela kufolisa ni kufa Moya o Kenile, Uteni mo. Ki Yena Ya kona ku li eza.

266 Cwale amuinamise litho za mina. Mu lumele ka yona nako ye cwale, ha Ni nze ni mi lapelela ni litaulo zee.

267 Ndata luna yakwa Lihalimu, kuya ka mo Ni zibela, Ni fitile mwahala baenyi kaufela bene bali baenyi, kuya ka mo ne Ni i kutwela kuba ya fokola ni ku katala; ni ikutwile kuli mwendi ye kona nako yeo Baketwa ba boni. Mañi ni mañi wa bona, Mulena, ya bizizwe ni ku lumelewa kubizwa ka Moya wa Hao; sesiñwi, tumelo ya bona, ba bile ni tumelo yeñata (babañwi ba bona) kufita mo ne ba hupulela kuli banani. Ba kalile fela cwalo mwa lipilu za bona.

268 Mi musali yana sweli sapalo sa Hae nako yeñwi Ha na fita, mi ki Ha sikuluha ni kubulela kuli, “Kimañi ya Ni sweli?”

Mi se bali, “Kihande, mañi ni mañi usweli wa Ku swala.”

269 Mi ali, “Kono Ni lemuhile kuli Ni fokozi.” Mi A fumana musali yomunyinyani mi a mu bulelela kuli nana ni butata bwa mweya, mi tumelo ya hae i mufolisize.

270 Mi Bibelee iize, kuli, “U sa li Muprisita Yomutuna, kacenu, ya kona kuswaliwa ka maikuto a matuku a luna.” Mañolo ali, “Yena waswana maabani, kacenu, ni kuyakuile.” Mi haiba Aba ya swana, mi ili Muprisita Yomutuna, Uka eza ka kuswana.

271 Mi cwale sicaba ha si bone kuli Keleke yetezi Moya itaha kwa toho ya yona. Kreste ubata kutaha kutonga Keleke ya Hae. Lisupo za Hae zetuna za mafelezezo, sina mo ne liinezi mwa Sodoma; Yana bulezi, yana zibile Sarah, mi na ziba kuli nana ni musali ya bizwa Sarah, a mu ziba ali mwa tende ni kuli na sehile; ki Hali, “Seo ikaba sona sisupo. Ha mu bona seo, muhupule, lusika lwani haluna kufela konji kaufela zona li talelezwe.” Ki se fa. Lu kwa mafelelezo.

272 Lumeleza, Mulena, kuli mutu ya kula kaufela mwahali mo azibe kuli Jesu Kreste yapila umwateni mo. Mi litaulo ze li fuyolwe kwa mubili o kula kaufela ko li ka ya. Ni kalimela diabulosi, kwa sicaba. Na mu leleka, ka Moya wa Mulimu, ka tumelo, Ni leleka muluti wa kukakanya kaufela. Mi mutu kaufela mo, ya lukiselize kwa Bupilo Bobusafeli, a Bu amuhele hola yee. Mi cwale kuakaleza kaufela, ku sa utwana kaufela, nto yenyinyani kaufela ya lifasi, buima bufi kaufela, sina Bibelee haibulezi kuli, “Ha lu beyeni kwatuko buima kaufela, ni sibi se si lu hanelela fakaufi; kuli lu mate, ka tibeledo, mwa takano ye li fapila luna; lu talimile” (kwa sikamañi? kwa keleke nji? kwa kopano nji?) “ku Mukalisi ni Mufezi wa tumelo ya luna,” yaliteni mo cwale, “Jesu Kreste, ili Mwana Mulimu.” Lu talimele ku Yena Ya. . . Ha lu lukeli kunga manzwi e luziba kuli ki a niti, kono ibo Manzwi ao a ezizwe a niti ku luna kakusasana cwana. Yena Jesu yaswana yana shwile yani, ha si ka shwa, U zuhile hape, mi lilimo likiti zepeli kasamulaho U tisa Keleke ya Hae kufita

kwa toho ya yona. Moya wa Judasi usweli kubeleka mwahala bona. Kono cwale ha ba beye kwatuko kaufela ze sitatalisa ni lika zeñwi kaufela, hola ye, mi ba Mu amuhele.

<sup>273</sup> Ha ba utwe, ze se baezize kale, mwahala kutazo. Ha ba lemuhe cwale kuli ona Manzwi aswana o ba utwile a bonahalile, mi ba A lemuha, kuli Ki Kreste. Mi cwale ha ba nge kezo, ba eze sika ka Yona: be I amuhele, mi ba yeme ka mahutu, bafe bupaki; mi ba ye mwa Mubuso wa Mulimu, ka kutazwa ka Moya o Kenile.

<sup>274</sup> Mi bakuli ha ba foliswe. Ni bona baba zielehile ba foliswe. Mi takazo ya pilu kaufela iezwe hande. Lumeleza cwalo, Mulimu Yamata kaufela.

<sup>275</sup> Cwale ni litho za mina zeinami cwalo, lipilu za mina liwaluhile, muipe fela ili mina nako ya tapelo; kale lu si ka, Na sepa, sebelezo ya kolobezo ya taha, kusikaba kale zeo. Ku kaba sebelezo yeñwi busihu boo.

<sup>276</sup> Cwale, muhupule, musike mwa tuhela kuli kolo ye imifitelele. Ni bile fa cwale seli liholo zepeli ni licika, kamba kufitelela, ni likile fela kuya ka kuiketa, ni kutisa hande Evangeli, ni ku Li tomahanya handende ka swanelo. Mi kona lu ka fita kwa maungulo. Mi palo yateni luli ki: kuutwa, kulemuha, kueza. Musike mwa li tuhelela ku mi fita fa litho za mina. Mu Li utwile. Kana mwa lemuha kuli Pata ya Hae iteni? Kana mwa ziba kuli Ki Yena yasweli ku mi biza? Kutuha foo mube ni kezo ka Lona. Mulimu abe ni mina. Mube ni mwaha wa tapelo.

<sup>277</sup> Muzwale Neville, aku tahe, fa nako nyana, mwa tapelo, haiba wa kona kutaha kwanu.

U mu swale fela.





*KUUTWA, KULEMUHA NI KUEZA*  
*SESIÑWI FA LINZWI LA MULIMU LOZ60-0221*  
(Hearing, Recognizing, Acting On The Word Of God)

Liñusa le ka Muzwale William Marrion Branham ne li kutalizwe lwa pili mwa Sikuwa la Sunda kakusasana, Yowa 21, 1960, ili fa Branham Tabernacle, mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi i hatizizwe ni kuhasanyiwa ki ba Voice Of God Recordings.

LOZI

©2020 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buńata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)